

Kinóló mole ala hakearaleti

¹ I dere fota, Kótóné Yesu Kerisopaae mo felekemó yaai dere alapa, naao kutó diratere so whiné tué yópóló, kinóló moletei hakearóló yó melae, yóló malepó. Ai fo Yesuné wosóló, ama kutó deratere whi Jon beterepaae *ensel* dotonalepó.

² Atétepa, Jon-né ama kelale ala so whi feané tué yópóló, amamo asęyalepó. Ai fota me kae mei, Kótóné dere foró Yesu Kerisoné ama yale alatamo etérápóló yó male fopó.

³ Take i ala yaalopóló i asęre fo hakeamó dosąatu betere whi Kótóné wisiró beterapa, hajné sukutu beterópóló yae. Ai dosąatere fō wosóló, hosaa tuámó mulatere so whikélé, wisiró beterápóló hajné sukutu betenérápó. Ti ai yó male alarape dokonóló yaaire be dę mo felekemó sókó waai dapó.

Talené doi hale horatere foró kǫléó dere fotamo

⁴ Ẹta, Jon-né Esia hae kwiamó betó mole wẹikeró Keriso fake so whipaae dapó.

Miókélé betóó, takekélé bitiré wóó, nalo waaire alimókélé hale betóó, yaaire sekéró kale tẹteróló kaae tare doasi betere tiki felekemó betere wẹikeró keperapetamo tuámó kaaróló wale hamokoróló hale tao sere alaró, hosaa muni deyóló dua betere alatamo diąpaae erópóló yae.

⁵ Ti Yesu Kerisoné yó matere fota, ama mo kelale alatóró du beterapó. Ti ąta, mo sukąletei

kepaayóló betaaire so whimó, tū aleróló folosóró fóló betere whípó. Atéturaalu, i haemó betó mole topo whirapekélé mo fea amatóró tēteróló kaae tarapó.

Ai sekéné amatóró diāpaae yaala sókó furaalu, dā dowi ala tuamó betēpa, ama sameanétei ter-aayóló hāle fópóló eró beterapó.

⁶ Téro dā ama tēteróló kaae tare aqmó sóró beteróló, Alima Kótóné ama ala erópóló, so whimó momaratere whi sóró beteralepó. Téreteiné, ai seké ama mo kae ere ala wisiró doasi fotokotamo mo hāle muó tanópóló yae! Mo kée, téyópóló yae!

⁷ I dere fo wosae! A ó hepen bemó ere saktamo wapa, so whi mo feanékélé, take ā duraalu wutiné deyale whirapenékélé, kelaalo ai ape.

Atéteremó, i hae kwia feamó betóló fale so whiné doasi wole u yaalopó.

Ti ai alata, motóró yaalo ai ape. Mo kée, téyópóló yae!

⁸ Téro Tale Kótóné duraalu,
 “Ēta, *Alaparó Omekatamopó*. Ai fo feteyóló, kaae sereteiró kemeratereteitamota, ti mo ętórótípó. Take bitiré waletēikélé, mió betereitēikélé, take nalo betaaireitēikélé, ętóró bitu, fea ọla ọla tēteróló kaae tare seké ętórótípó,” yalepó.

Whiné Naalema aqpa kelale fo

⁹ Ēta, diaaq no Jon-né dapó. Dā fea Yesu tuamó bitu, seké sere alakélé, ama tēteróló kaae tare aqmó betere alakélé, hōni hāle belée tare alakélé, dā fea betamó deté fu betere whípó. Yesuné yale ala i ape yóló yó melóo, Kótóné fo eróo, yalemó

atimané ę węiné bopéro daaló betere hae Patmos-mó beteralepó.

¹⁰ Atéro betepa, Talené be demó Deī kepe wisiné fotokọ tuamó bitu, ęalo kılıpaae doasi fo fake ukulumó wutiné hale kaae depa wosalepó.

¹¹ Atéro dere foné duraalu, “Naao keletere ala fea bopeyóló mole sókumó aseyóló, ęikeró Keriso fake so whıpaae falae. Ai berape i ape. Efesus, Smerna, Perkamum, Taiyatira, Sardis, Piladelpia, Laodisia, i dosayale be huluamó betó mole Keriso so whı feapaae aseyóló falae,” yalepó.

¹² Ai fo du betepa, né déro sisópaae fetée fóló kelalemó, *kold kapané* aleale ęikeró sọ dirirape kelalepó.

¹³ Atépa, ai sọ dirirape duku betere tuą dolomó whı betą Whıné Naalema kaae daapa kelalepó. Atéru, deróló sókó fatere fọloi kuti deróló, *kold kapané* aleale toné ai kuti tẹteróló bopémó sepa kelalepó.

¹⁴ Ama toporó nikitamota, mo yako kaae de wisinaale yóo, ama kelekélé si mi kaae holóo, depa kelalepó.

¹⁵ Ama hóta, ti *brons kapa* siné dóló whaare kaae yóo, ama dere fokélé, ęi doų kąturaalu dere hu kaae depa wosalepó.

¹⁶ Ama turu naasené ęikeró horerape tawóo, ama kólómó bóe dele sepake fosó tamo daai sókó wóo, ama kelepaakélé, sukané de kaae yóo, epa kelalepó.

¹⁷ ęalo ą kilituraalu, ę ama hó aqmó sukąle whı kaae deraapisa fóló molepó. Atéro mupa, ama turu naasené ę wolaa yóló duraalu, “ęa wiyaęse.

Kaae sereteikélé, kemetereteikélé, mo ətórótípó.

¹⁸ Ẽta, mo ti betere seképó. Ẽ take sukāletei, momó kepaayóló mo titóró betó tarapó. Téruraalu, sukutere alaró sukāle so whītamo betere tū *ki* yālo i tare ape.

¹⁹ Térapa, naao kelale alakélé, mió i alimó keletere alakélé, nalo betaaire alimó yaaire alakélé aseyae.

²⁰ Yālo turu naasemó mupa, naao kelale wēikeró hōreraperó *kold kapané* aleale wēikeró sā dirirapetamo kelale bete i ape. Kale hōrerapeta, ti u wēikeró be huluarapemó betó mole Keriso so whī tao sōpóló, dotonale wēikeró *ensel*-rapepó. Kale wēikeró sā dirirapeta, ti wēikeró be huluamó betó mole Keriso so whīpó,” yalepó.

2

Efesus Keriso so whīpaae aseyóló farale fo

¹ “Efesus be huluamó betó mole Keriso so whī tao sōpóló dotēyale *ensel*-paae i fo aseyóló falae.

Turu naasené kale wēikeró hōrerape taruraalu, *kold kapané* aleale wēikeró sā dirirape daae mole tuāmó kutu betere sekéné dere fo i ape.

² Diā hōkélé ini, mepaae du betere alarape yālo tuénipóló de? Diā hōkélé ini, depe tukó wei ala hāle yó tare alakélé, kale dowi ala yó tareteikélé, whīrape diātamo betāmó betaqsóró hōkó fatu betere alakélé, yālo tuérápó. Mepaae whīrapené duraalu, ‘Dāta, Talené dotonatepa wale *aposel* whīrapepó,’ dere fomó, diāné atima

kāae kolóló duraalu, ‘Diāta kapala fo bole whīrapepó dere alakélé kolóló, yālo mo tuērapó.’

³ Diā yālo so whī betepa, mepaae sekei ala ó faletere alarape wou betepatei diā hōyóló dekani, yālo doimó hāle yó tarapó.

⁴ Tépatei, yālo keletepa wisinire ala betā i ape. Take kaae suraalu diaaō yaala sókó fu betale ala mió taaló beteraipó.

⁵ Térapa, take diaaō yaala sókó fu betale ala taaróló, mió diā haepaae ai derepalapa kisipa muae. Atétu, diaaō kisipa tiki feteyóló take du betale ala momó yae. Diā ai alatamo initepa, ti ē diā beterepaae wóló diāné dērōtu betere sā yālo tokó saalopó.

⁶ Téretei, diaaō du betere alamó yālo i yaaitere fo betā mo wisirapó. Nikolas whīrapenē hōtu betere kaae diaaōkélé atétu beteraipó.

⁷ Mepaae whī me de woséli daapa, ti Dēi Kepe Wisiné kae kae Keriso so whīpaae du betere fo feané wosópóló yae. Whī me de tū wisipaae faai fupa, me sekei alané sesé depakélé hepée taae faróló wale whīta, Kótó betere kelaalo mo kokōi tikimó daale kepaayóló mo ti betaaire ni du wisi nópóló yālo melaalopó,” yalepó.

Smerna Keriso so whīpaae aseýóló farale fo

⁸ “Smerna be huluamó betó mole Keriso so whī tao sópóló dotonale *ensel*-paae i fo aseýóló falae.

I dere fota, kaae sereteiró kemberale foleteitamóné bete Tale ā mo ti sukāletei, momó kepaayóló betere sekéné dapó.

⁹ Diāpaae kae kae sekei alarape wou bituraalu, yoleale yóló betere ala yālo tuēretei, doasi

dirii ɔla wisinaale betɔ diɔné sóró tareteiné, diɔ doasi néli whi kaae ai betere ape. Mepaae so whi atima Juda fakepó du beteretei kapala fo dapó. Ti atimata, Satan-né fo wosetere fake bituraalu, diɔ erótu betere fo yało kisiparapó.

¹⁰ Diɔpaae sekei ala waaiemó wiyaqse yóló, ma fo i dapa wosae. Diɔ betere ala kaae ke-laairaaalu, Satan-né diɔ mepaae so whi *dipula* beteraalo ai ape. Atéró *dipula* beteró betepa, sekei ala siré fu bituraalu, naase tamo be ɔrape kemeyaalopó. Diɔ dupakélé me ɔla meipóló, tué tiki tiraté fu betepa, ti atétere whirapemó bóené whi dolóló kemeratere whiné deratere topo tao su dere kaae, yało mo ti betere bete melaalo ai ape.

¹¹ Mepaae whi de woséli daapata, kale Deɔ Kepe Wisiné Keriso fakerapepaae i dere fo wosópóló yae. Whi me de tu wisipaae faai feɔlalemó sesétepakélé, hepée taae faróló wapata, ti atétere whi ɔ tamoróló sukutere alané doraalo meipó.”

Pergamum Keriso so whipaae aseýóló farale fo

¹² “Perkamum be huluamó betó mole Keriso so whi tao sópóló dotonale *ensel*-paae i fo aseýóló falae.

Fosó tamo daale bóe dele sepake tare sekéné dere fo i ape.

¹³ Diɔta, Satan-né ama teteróló kaae tare tikimó beteretei yało kisiparapó. Diɔ atéró bitutei, yało doimó du betere ala taaréni, hałe yó tarapó. Take yało ala erótu betale whi Antipas dale alimó, diɔné ɔpaae tué tiki tiratere ala taaréni, hałe yó

tawaletei yało tuérápó. Ti diąta, Satan betere be huluamó ai betere ape.

¹⁴ Tépatei, diaaọ dere mepaae ala yało keletómó wisiniretei i ape. Dią betó mole kua dolomó, mepaae so whị Balam-né họko yó mótu betale ala kaae du beterápó. Balam-né Balak-paae Israel fake so whị dowi ala yópóló, etéro yae yóló yó melalepó. Balak-né Israel fake so whị kapala kótópaae moma yóló matere ọlaró nọpu nokole alatamo yópóló, ọlísóró fipakalepó.

¹⁵ Atétu betere kaae, dią mepaae whịrapekélé Nikolas whịrapené yó matere ala sya fu beterápó.

¹⁶ Térapa, diaaọ ai du betere ala taaróló, kisipa tiki feteyóló betae. Diątamo ai ala initepa, ti ẹ dią beterepaae hapale sókó wóló, dią ai ala du betere whịrapetamo yało kọlómó sókó wale sepakené bóe daalopó.

¹⁷ Mepaae whị de woséli daapata, kale Dẹi Kepe Wisiné Keriso fakerapepaae du betere fo wosópóló yae. Whị me de tụ wisipaae faai fenalemó sesétepakélé, hepée taae faróló wapa, ti atétere whịmó yało hyọ muló betere mepaae *mana* o nópóló melaalopó. Téturaalu, kisi doi aseýóló muló betere dẹi kane fakekélé melaalopó. Ai kane fakemó asẹre doita, hałe mo whịné tuẹ yaalo meitei, ai kane fake sere whịné maaté tuẹ yaalopó.”

Taiyatira Keriso so whịpaae aseýóló farale fo

¹⁸ “Taiyatira be huluamó betó mole Keriso so whị tao sópóló, dotonale *ensel*-paae i fo aseýóló falaе.

I dere fota, Kótó Naalema ama kele mo si kaae dó taru, hōlekekélé kale *brons kapa* siné dóló kasa kasa kaae ere sekéné dapó.

¹⁹ Diaaḡ yaala sókó fole alakélé, diaaḡ tué tiki tiratere alakélé, yaḡo doimó mo so whi tao sóró erótu betere alakélé, sekḡ wapatei beléetóró tare alakélé, diaaḡ mió du betere alané take kaae suraalu yale ala bosene faletei, fea yaḡo tuérápó.

²⁰ Tépatēi, kale so Jesepel ḡ fópóló mo taketitei hókó faréniyólópó. Ai soné amatei ḡ Kótóné fo eratere kóló sopó du beterápó. Téturaalu, ama yó matere fonétei, yaḡo kutó diratere whirape nópu nokole ala yóo, kapala kótópaae momatere ḡla nópóló ḡlisóró fóo, du beterápó.

²¹ Ai soné nópu nuku betere ala taaróló, kisipa feteyóló wópóló kaae taté fu betepatei, wéni mo dowḡae fu beterápó.

²² Até du betereteiné, ḡ dele sóró fitere tikimótóró fiyó mulópóló, taae deraalópó. Téturaalu, ḡtamo nópu nuku betere whirapekélé kale soné atimapaee yó melale dowi ala taaróló, tué tiki feteyóló anitepa, ti atimakélé kale so dere kaae, dele sópóló taae deraalópó.

²³ Ai soné ama naale senaalekélé sinópóló, yaḡo mo ti daalópó. Ai ala depa, Keriso fake so whi feané kilitu, ḡta, so whiné hosaa tuamó mole alaró tué tikitamo taleyóló, atimané yale alamó mo donotóró tokḡ matere Tale beterápóló kisipa yaalo ai ape.

²⁴ Diḡ mepaae Taiyatira be huluamó betó mole Keriso so whi kale soné yó matere fo wosóló sya feni yóo, Satan-né mo apaae derepale kinóló mole ala kisipa sini yóo, ere so whipaae yaḡo sekḡi

ala kae eraalo meipó.

²⁵ Téyaalomeipa, ę wale alimó sókó faasepóló, diaaę ai du betere wisi alatóró hęle yó taté fo betae.

²⁶ Whi me de tu wisipaae faai fenalemó, me sekęi alané sesé depakélé, hepée taae faróló, kemene fole kwiamó sókó fupa, ti atétere whi i hae kwiamó betó mole so whi fea teteróló kaae tanópóló, ęło sóló beteraalopó.

²⁷ Asemó ere fo i ape.

‘Topo whinė tatere *aiyon kapa*-né aleale dotótiki taru, haené aleale wuti derąketu dere kaae, ęło bóe whirape ai ala yaalopó,’ erapó.

Ęło Ayané ę so whi teteróló kaae tanópóló sóló beterótu yale kaae, ęłokélé dię sóló beter-aalo ai ape.

²⁸ Atéró sóló beteratere so whipaae hika be deteretamo deýó tare hęrekélé, ęło melaalopó.

²⁹ Mepaae so whi me wosęli daapata, kale Deį Kepe Wisiné Keriso fakerapepaae i du betere fo wosóló tuę muópóló yae,” yalepó.

3

Sardis Keriso so whipaae aseýóló farale fo

¹ “Sardis be hulúamó betó mole Keriso so whi tao sópóló dotęyale *ensel*-paae i fo aseýóló falae.

Kótóné węikeró kepe tawóo, węikeró hęrerape tawóo, ere whinė dere fo i ape. Dięné du betere ala ęło kolóló kisiparapó. Mepaae so whinė dię kilituraalu, i Keriso faketa, Kótóné ala eraai noke fini, mo doa ketekę bulapóló dukiróturaalu, diaaę doi só kutu beterepó. Téretei dię ęło keletepa sukęle whi aęrapó.

² Diā fire whīrape-ó, turukó horóló betae! Dīaaq du betale wisi ala fea sisiraae fóló betā betā betereitei felekemó sukāai dapa, fotokq buóló daayae. Ti noatepae, ę teteróló kaae tare Kótóné keletómó dīaaq erótu betere ala mo turó kemeróló, ama muló betere dālemó sókó fenipó.

³ Térapa, diāné take wosóló tuēre fo kisipa muae. Ai fo aqmó sukóló bitu, kisipa feteyóló ai fo sya fóló erótu betae. Ę waaire be dę diā kisipani, mokqleyaa yóló betó mupa, ę qlémi nokole whī kaae, sókó waalo ai ape.

⁴ Téyaalotei, diā Sardis bemó betere whīrape kuamó betā betā so whīné deró betere kuti mo wisiyóló kaae tare tikimó, bólukélé inipó. Ai whīrapeta, dęi kuti deróló ętamo kwęyaalopó. Ti noatepae, atima dere ala wisireteiné ai ala yaaire mo şurapó.

⁵ Whī me de tų wisipaae faai fenalemó, sesé depakélé hepée taae faróló wale whīta, ti u kale so whīné deró betere dęi kuti kaaetóró deraalo ai ape. Ai whīné ama doita, mo titóró betó tare *buk*-mó moletei yālo helekókélé yaalo meipó. Téni, yālo Ayaró ama *ensel*-rapetamoné keletómó daalu, ita yālo whīpóló, yó melaalopó.

⁶ Mepaae whī de woséli daapa, ti kale Dęi Kepe Wisiné Keriso fakerapepaae du betere fo wosóló tuę muqópóló yae,” yalepó.

Filadelpia Keriso so whīpaae aseýóló farale fo

⁷ “Filadelpia be huluamó betó mole Keriso so whī tao sópóló dotęyale *ensel*-paae i fo aseýóló falae.

I dere fota mo fo bete Tale dowi ala betakélé muni, kae betere sekéné dapó. Take betale whi Depit-né ki mió yalo i tare ape. Yalo kinatere tū me whiné tukiyóo, yalo tukwē mulatere tū mené kinóo, enénipó.

⁸ Diaaḡ du betere ala yalo kisiparapó. Diā faaire tū yalo ai tukwē muló beterapa kelaē. Ai tūta, whi mené kinatere alakélé mo enénipó. Diā fotokḡ sawa bulutei, yalo fo hāle eró tarapó. Tēru, mepaae so whiné yalo doi yóló, diā Talené so whié yóló wosetepa, diāné meipó initeretei yalo mo kisiparapó.

⁹ Mepaae whi atimata, Juda fakepó du betepatei, Juda fake mei, kapala fo du beterapó. Ai so whīta, dowi Satan-né fo wosetere fake ai ape. Atima diā beterepaae wóló, diaaḡ hó aḡmó deraapisa fóló fió muluraalu, i so whīta Yesuné yaala sókó fole ala mulapó yópóló, dere ala yalo eraalopó.

¹⁰ Yalo diāpaae sekēi ala wapakélé hāle eró tawae yale fo diaaḡ wosóló eró tawalepó. Téyaletēiné i haemó betó mole so whi fea sū sóró kḡae keletere sekē wale sukamó, diāpaae waḡsóró yalo sesé yaalopó.

¹¹ E mo felekemó walapó. Bóe dóló tēteratere whiné sere topo tao diaaḡ saairetei, mené saḡsóró diāné tēteróló kaae tanópóló male ḡla wisi mo hotowayóló kae tawae.

¹² Whi me de tū wisipaae faai fenalemó, sesé depakélé hepée taae faróló wapa, ti atétere whi e tēteróló kaae tare Kótóné momatere be hulua eleké sū deyaalopó. Atétere sekē a ai be taaróló

fókélé mo yaalomeipó. Ai whiné tikimó ę tẹteróló kaae tare Kótóné doiró ama be hulua doitamo aseyaalopó. Ti ai be hulua doita, kisi Jerusalem-pó. Ai be huluata, ę tẹteróló kaae tare Kótó betere hepen be taaróló, dorowaalo ai ape. Ai whiné tikimó yalo kisi doikélé aseyaalopó.

¹³ Mepaae whi de woséli daapa, ti kale Deji Kepe Wisiné Keriso fakerapepaae i dere fo wosóló tuę muópóló yae,” yalepó.

Laodisia Keriso so whipaae aseyóló farale fo

¹⁴ “Laodisia be huluamó betó mole Keriso so whi tao sópóló dotonale *ensel*-paae i fo aseyóló falae.

I dere fota, Mo kée, téyópóló yae! dere bete Tale bitu, mo ala yó taruraalu, ama kelale ala i ape yóló hakearóló yó mótu beterapó. Aṭa, Kótóné aleyóló muló betere ọla ọla fea tẹteróló kaae tare sekéné dapa wosae.

¹⁵ Diṣané du betere alata yalo tuẹretei, sirii ala ó supui ala meiyóló, hẹle tuamó beterapó. Ai tamo ala me taaróló betẹ alatóró uasóró ti mo wisi wuapó.

¹⁶ Ti diṭa, supukélé meiyóo, sirikélé meiyóo, yóló hị fale ọla kaae epa kilitu, yalo kólómó hamuóló soraae falatere ọla kaae soraae faraalo ai ape.

¹⁷ Diṣané duraalu, ‘Dṭa, wisi wisi ọla mole néli whi betereteiné mo betẹ ọlakélé yaṣanipó,’ dua dapó. Téretei, Tale Kótóné diṭ keletepa, mo son-aalei so whi betepa kilitu, kọlerapó du beterapó. Diṭa, yolealere alakélé, keke dilikire alakélé tiki daapi hẹle betere alakélé, epatei, diaaṣ kisipané wisire nisi dapó.

18 Yalo i dere ma fo wisi wosóló, i sore ɔla diané ɛtamo dupu yae. Siné biliyaletikimó wisiyóló sókó wale *kold kapa* supa, ti diá mo doasi néli whi betaalo ai ape. Diá tiki haletetei, kinóló dei kuti sóró bukae. Diaaɔ kele dilikiretei wisiyópóló, yalo i tare *mula mula* sóró dilae.

19 Yalo yaala sókó fale so whi atima kae kae dowi ala depa kilitu, tu wisipaae fópóló donoróturaalu, yalo atima foné sóró dekésu betepó. Térapa, yalo diapaae dowi ala taalae du betere fo mopóló, tué tiki feteyóló Tale Kótóné alamó keteke buóló betae.

20 Eɛta, tu sókó walemó daalu, tu du betepó. Whi me denétamo yalo dere fo wosóló tu tukutepa, ti ɛ a betere tuapaae wóló, ɛtamo ɔla betámó nóo, ɛkélé ɛtamo ɔla betámó nóo, yaalo ai ape.

21 E tu wisipaae folemó sekei alané sesé depatei, hepée taae faróló, yalo Ayané teteróló kaae tare tikimó ɛtamó betámó betalepó. Atére kaae, diákélé tu wisipaae fole ala kilitu sesé depatei, hepée taae faróló wapa, ti yalo teteróló kae tare tikimó ɛtamo betámó sóró beteraalopó.

22 Mepaae whi de woséli daapa, ti kale Dei Kepe Wisiné Keriso fakerapepaae i dere fo feané wosóló tué muópóló yae,” yalepó.

4

Hepen-mó teteróló kaae tare tiki

¹ Ai alarape yóló kemetepa kelalemó, hepen be tu tukwé fóló molepó. Atéru, folosóro ukulumó wuti hale kaae yóló fo yale whinétóro ɛpaae duraalu “Yá ipaae holae yalepó. Yá hotopa, ti i

alarape yóló kemene fupa, nalo yaaire ala yało yapaae yó melaalopó,” yalepó.

² Tétepa, mo ai fapotóró Dēi Kepe Wisiné ę fo-tokorátepa kelalemó, hepen bemó ę daalepaae anóló, tēteróló kaae tare topo whi betere sea tómó doasi beterepó.

³ Ai seamó betere doasi kolóló, *jasparó kanilian* kanetamoné kasa kasa kaae ere doasi beterepó. Ti ai seké ą betere tikita, sikipa douné bopéró beterepó. Ai sikipa douṭa, *emerald* kane kasa kasa kaae epa kelalepó.

⁴ Kale tēteróló kaae tare doasi betere tiki bopéróló, 24 whi disirape 24 sea dokoyóló betó molepó. Ai sekērape atimané deró betere kutita, mo dēi wisinaale deróo, atimané topomókélé tēteróló kaae tare doasiné deró betere *kold kapané* aleale topo tao deróo epa kelalepó.

⁵ Ai kale doasi betere tikimó epée fitāa duraalu, be sapalaa yóo, tēteróló kaae tare doasiné kutiriró beterepaae anóló, wēikeró sá dirirape dó diliki yóo, erepó. Ai sá dirirapeta, Kótóné wēikeró keperapepó.

⁶ Atéró kelalemó, kale tēteróló kaae tare sea mole hosaamó wēi kēla wisinaale belerepó. Ai wēita, *klas* kasa kasa kaae erepó.

Kale tēteróló kaae tare doasi betere tuamó, Kótóné aleale douro betere ọlarape ai doasi bopéróló betó molepó. Ai kale douro betere ọlané tikimó hosaapaaekélé sisópaaekélé mo fea keletóro daae molepó.

⁷ Kale douro betere ọlarapené ere ala i ape. Kolosale ọlata, ti *laiyon* kaae beterepó. Kolosale noma ọla ti hae dukiyaaí só kotere *bulmakau* wá

hupu kaae beterepó. Dou noma ti whiné kelepaa kaae daai ɔla beterepó. Dou ti sikimó sɛ kotere ba dukaa kaae beterepó.

⁸ Ai douró ɔlarape atima dokɔ fea baase apomiró daalepó. Atimané tikimó ere kaae baase aɔrókélé keletóro daae molepó. Ti ai sekɛrape atima dɛtamokélé dikitamokélé etei fo hɛle yótóro tarapó.

“Mo doasi fotokɔ bole mo kae betere Tale Kótó
ɔ take biteré wóo, miókélé, nalo waaire
alimókélé ɛtóró hɛle betó tawaalopó fo,”
momó du momó du, du betalepó.

⁹ Ai douró betere ɔlarape atima kale tɛtéróló kaae tare doasi betere tikimó bitu ama ere doakale doi mole Talepae mo kée yóló dukiraterere fo du betepa, kale tɛtéróló kaae tare 24 whi disirapekélé i ala dua dapó. Atima betere searape taaróló, haemó deraapisa fóló mulu, kale tɛtéróló kaae tare doasi betere tikimó mo ti betó tare Talepae mo kée yóló, ɔ aɔmó sukóló bitua dapó.

¹⁰ Ai 24 whi disirape atimané deró betere topo tao-rape sókó su yóló, tɛtéróló kaae tare doasi betere tiki felekemó mulóló duraalu,

¹¹ “Dɔ tɛtéróló kaae tare Tale Kótóo, fea ɔla naaotóro aleyóló muló beterapó.

Aita naao kisipa mole alatóro sya furaalu,
kaaró betereteiné takekélé miókélé, atima
hɛle betó tarapó.

Naao fotokɔné ai alarape epa yɔ doasi doi mulaterere alakélé, naao doi hale horaterere alakélé, dɛné yapaae mo sumó eranérápó,”
dua dapó.

5

Bopeyóló muló betere asere sókuró Sipsip hupu maletamomó ere fo

¹ Téró yalo kelalemó, kale teteróló kaae tare doasi a seamó bitu, betá bopeyóló mole sóku utékélé itékélé asereitei, ama turu naasené tarepó. Ai asê mo whiné kelaqsóró, kinóló weikeró dirii qlané diriróló datekáró betepa kelalepó.

² Atépa, mo doakale fotokó bole *ensel*-né fo fakeyóló duraalu, “I bopeyóló mole asê datekáró betere qlarape mé whiné dáyóló teraanére?” yalepó.

³ Térené ó hepen bemókélé, i haemókélé, hae aorókélé, ai bopeyóló muló betteretei teraayóo, u tuámó aseyóló mole fokélé kolóo yaaire whi mo betakókélé bitinipó.

⁴ Kale bopeyóló muló betere q̄la teraayóo, tuámó aseyóló muló betere fo kolóo, yaai sure whi mo betakélé bitinipa kilitu, ę dekené sini wole du betalepó.

⁵ Atétu betalemó, kale whi disirapekó betané ępaae duraalu, “Wolekesé. Juda fake tuámó wale *Laiyon*-ta, Depit kaayale bete ai walapa kela. Ai sekéné ama bóe whi dóló teteró bettereteiné kale bopeyóló mole asê datekáró betere weikeró qlarape ama betá sumó tukóló dāanérápó,” yalepó.

⁶ Atétepa kelalemó, betá *sipsip* hupu male teteróló kaae tare doasi betere tuámó daalepó. Ai *sipsip* hupu maleta, whiné daletikimó sukale nisi erepó. A doasi betere tuā dolomó, kale douró betere qlaraperó 24 whi disirapetamoné a bopéróló daae molepó. Ai tuámó daale

Sipsip hupu malenē topomó wēikeró sekéró wēikeró kelerapetamo daae molepó. Ai sekéró keperapetamota, Kótóné i hae kwiamó betó mole so whīpaae dotonale wēikeró keperapepó.

⁷ Ai seké ą wóló, kale bopeyóló muló betere asēre sóku, kale tēteróló kaae tare tikimó betere doasiné turu naasené tapa salepó.

⁸ Kale sekéné asēre sóku sóró tapa kilitu, douró betere ɔlaraperó kale tēteróló kaae tare 24 whī disirapetamo atima kale *Sipsip* hupu male daale felekemó deraapisa fóló fió molepó. Ai whīrape atima dokó feané *kita* kaae ɔla *harp* tawóo *kold kapané* aleale okopoi nukurape tawóo, erepó. Ai nukurape tómó simó bilitepa felé kēlaa wisi wale ɔlarape belerepó. Ti ai felé kēlaa wisi wale ɔlata, Kótóné ama so whīpóló kae beteró betere so whīné momatere fopó.

⁹ Téro atimané kisi wole foné duraalu,

“Yata, ai bopeyóló muló betere asēre sóku ter-aayaaire mo sūrapó.

Ti noatepae, yā dupa sókó fele sameané Kótóné so whī beteraai, kae kae fakekélé, kae kae be fo bole so whīkélé, kae kae tiki daale so whīkélé, kae kae *Gavman*-né tēteróló kaae tare so whīkélé, i dosayale fakerape tuamó mepaae so whī naao sameané dupuralepó.

¹⁰ Naao dupurale so whī atimata, Kótóné tēteróló kaae tare aomó betóo, Kótóné ala eróturaalu moma yóo, yópóló naaotei sóró beteralepó. Atéyale so whī atimané i hae kwia fea tēteróló kaae tawaalo ai ape,” yalepó.

¹¹ Téró yalo kelalemó, kale doasi betere *sea* bopéróló douró betere ɔlarape daayóo, ai sisómó 24 whi disirape daayóo, ai tɛ faróló *ensel*-rape mo ni sóku kaae (100,000,000) wó mulu, i wole fo du betepa wosalepó.

¹²

“Tɛteróló kaae tare fotokɔkélé, mepaae wisi wisi ɔlakélé, fosó fosói kisipakélé, fotokɔkélé, doasi doi mole alakélé, ama ere ala wisi hakearatereteikélé, ama doi sóró horatere alakélé, fea dɛné ɔpaae eratepa, kale dale *Sipsip* hupu malené mo sɔmó senérapó,” du betalepó.

¹³ Téró, Kótóné hepen bemó aleyóló muló betere ɔlakélé, i hae tómó betó mole ɔlakélé, hae aɔró betó mole ɔlarapekélé, wɛi tuámó betó mole ɔlarape feané ɔlóló betɔpaae touróló i wole fo du betepa yalo wosalepó.

“Kale tɛteróló kaae tare *seamó* betere sekéró *Sipsip* hupu maletamo dukiróló hale horatere alakélé,
doasi doi mulatere alakélé, ama ere ala wisi hakearaterere alakélé,

fotokɔ bole alakélé,

betere dokɔ fea atimaamopaae eraté fu beterɔpóló yae!” du betalepó.

¹⁴ Atétu betepa, kale douró betere ɔlarapéné duraalu, “Mó kée, téyɔpóló yae,” fo dekeró yó tawalepó. Atimané ai fo depa, kale 24 whi disirape deraapisa fóló mulu, Talené doi sóró horótu betalepó.

6

Diriróló kinó betere ɔlarape

¹ Téró, kale *Sipsip* hupu malené bopeyóló mole asere sóku diriróló kinó betere weikéro ɔla betá tukóló teraatepa kaae taremó, ai douró betere ɔlakó betané “Ape!” dere fo be sapalaa dere kaae yalepó.

² Atétepa kelalemó, betá dei *hos* hupu ɛ daalepaae anóló mo tumó daalepó. Ai *hos* hupu tómó betere whiné diki tawóo, doasi tetéroló kaae tare whiné deratene topo tao mené a maletei deróo erepó. Atéro deróló, bóe whi dóló torokó falaai mo doakale keteke buló felepó.

³ Kale *Sipsip* hupu malené kolosale noma kinóló datekaró betere ɔla tukóló daayalemó, kale kolosale noma betere ɔlané, “Ape!” yalepó.

⁴ Teró me *hos* hupu sókó wapa kelalemó, mo si mi sonaa kaae erepó. Ai hupu tómó betóló wale whipaae, i haemó mole so whi hosaa muni deyóló dua betere ala fasó sóró, bóe dóló u du i du yópóló, mené fotokó amó malepó. Téturaalu, apaae doasi bóe dele sepakekélé mené melalepó.

⁵ Téró, kale *Sipsip* hupu malené dou noma ɔla tukóló daayalemó, kale dou noma betere ɔlané duraalu, “Ape!” yalepó. Atétepa kaae taremó, dilikii *hos* hupu wóló ɛ daalepaae anóló daalu, betá seke dale sere ɔla *skel* tarepó.

⁶ Atétepa, yalo wosalemó, kale douró betere ɔlarape kuamó whiné fo kaae yóló duraalu, “Betá whi betá be demó kutó diteremó sere *moniné whit* o betá *lita ó bali* o sore *lita* wuti senérapó.

Térapa, nokole *Olip wel* weiró wain weitamo betá doraqsóro hotowaró kaae tawae,” yalepó.

⁷ Téró, kale *Sipsip* hupu malené dou kinó betere ɔla tukóló teraatepa kaae taremó, dou betere ɔlané duraalu, “Ape!” yalepó.

⁸ Atétepa kelalemó, ɛ daalepaae anóló betá sini tiki daale *hos* hupu daalepó. Ai *hos* hupu tómóta, sukutere ala bete tare whi beterepó. Ai *hos*-né sisómó sukutere ala betepa, ai hupuné kílímó sukutere so whi betere tiki ama doi *Hedis* wou be-talepó. Ai whi tamopaae, hae kwia feamó betóló fale so whi dópóló fotokɔ bulalepó. Ti so whi daaireteita, atimaamoné bóe dele sepakenékélé, wote alinékéle, doakale hepo alinékéle, i haemó betó mole syaae kaae ɔlanékélé, dilé kweyópóló fotokɔ sumó melalepó. Atéro dilé kuturaalu, douró fake beteretei betá fake duraalu, sore fake beterópóló taaraalopó. I hae kwia feamó betóló fale so whi atéro dilé kweyóló kemerae, yóló fotokɔ sumó matepa tarepó.

⁹ Téró kale *Sipsip* hupu malené apo kinó betere ɔla tukóló teraatepa kaae taremó, momatere kapo daale aqmó keperape betó mupa kelalepó. Ai keperapeta, Kótóné fo yó matere alaró Yesu Keriso etei kaae Talepóló yó matere alatamo deremó, mepaae whiné dale keperapó.

¹⁰ Ai sekérape atimané fo fake yóló duraalu, “Mo fo faanuraalu betere bete tale bitu, fea ala teteróló kaae tare Tale-ó, i haemó betó mole so whiné dowi alaró dɔ duraalu sókó farale sameatamomó tale yóló kwia melaaire be dɛ wópóló meteró felimó kaae tawóló betaaloé?” yalepó.

¹¹ Atéró atima dokō feamó deróló sókó fatere deī kuti melóló duraalu, “Diā betā kutó diratere norape atimakélé mené dōpóló sawa kaae tawae. Ti noatepae, i dosāayale daaire whīrape fea sumó dóló kemerēni teópó,” yalepó.

¹² Yālo kaae taremó, apomiró datekāró betere ɔla tukóló teraayalepó. Atéró teraateremó, doakale bao yóló, suka mo ti diliki yóo, wéliékélé mo samea betāae fo erepó.

¹³ Samó daae mole hōrerapekélé, doakale beséné nose du hara torokó derótu dere kaae torokó deralepó.

¹⁴ Sāta, asētere sóku bopetu dere kaae bopeté fóló alune felepó. Hae kwia feamó daae mole hasi fosórapekélé, wēiné tukóló bopéró betere haerapekélé, daale tiki taaróló, kae tikipaae daane felepó.

¹⁵ Hae kwia fea tēteróló kaae tare topo whīrapekélé, atima betale sirimó betaaire naalerapekélé, diki tare whīrape tēteróló kaae tare topo whīrapekélé, néli whīrapekélé, bōe dele fotokō bole whīrapekélé, wae sóró beteratere whīrapekélé, kōleaané betó mole whīkélé, kapo dolopaae hyó muni fōo, kapo beléli dolopaae hyó muni fōo yalepó.

¹⁶ Atima atéró fóló bituraalu, hasi fosópaaekélé, kapo fakepaaekélé duraalu, “Kolokó dorowouraalu dā teiyane dere ape. Ti noatepae, tēteróló kaae tare tikimó betere sekéné kelepaaró *Sipsip* hupu maaletamoné fopaae bole alatamo dāné kelaqsóró kinae.

¹⁷ Ti noatepa meipó. Atimaamoné doakale fopaae butu kwia matere be de ai sókó wale

ape. Atétere be demó de daanére? Mo daayókélé enénipa wiyae,” du betalepó.

7

144,000 so whi sirirale fo

¹ Ai ala yóló kílípaae i douró hae kwiamó douró *ensel* dokó yóló daapa kelalepó. Atéró daalu, haepaaekélé, doasi wẹi kẹlapaaekélé, besẹ tiki waq́sóró, atima dokó feané sesétu beterepó.

²⁻³ Atéró, *ensel* me kae suka hoteró ẹ daalepaae wou betepa kelalepó. Ai *ensel*-né mo ti betere Kótóné siriró betere ọla tarepó. Ai *ensel*-né haekélé, wẹi kẹlakélé, doraaire fotokó bole douró *ensel*-rapepaae fo fakeyóló duraalu, “Kótóné kutó diratere so whiné kutirimó siripi eraaipa, hae tikikélé, wẹi kẹlakélé, nirapekélé, hapale doréni kaae tawae,” yalepó.

⁴ Ai sirirale so whi dosąatepa yalo wosaleti i ape. 144,000 so whita, Israel fakerapetórótípó.

⁵⁻⁸ Juda fake dosąayóló sirirale so whi dokó sóró touróturaalu 12,000-rópó.

Ruben-né fake touróturaalu 12,000,

Kad-né fake touróturaalu 12,000,

Aser-né fake touróturaalu 12,000,

Naptaliné fake touróturaalu 12,000,

Manasené fake touróturaalu 12,000,

Simeon-né fake touróturaalu 12,000,

Lipainé fake touróturaalu 12,000,

Isakar-né fake touróturaalu 12,000,

Sepulun-né fake touróturaalu 12,000,

Josep-né fake touróturaalu 12,000,

Benjamin-né fake touróturaalu 12,000-rópó.

So whi hāle ʔla kaae ʔei kuti deróló daae mole fo

⁹ Ai ala yóló kemetepa kese faralemó, so whi mo hāle ʔla kaae daae molepó. Ai daae mole so whiʔa, betā be huluamó maaté wenipó. Kae kae *Gavman*-né tēteróló kaae tare so whikélé, kae kae tiki daale so whikélé, kae kae be fo bole so whikélé, kae kae fake so whikélé, kale tēteróló kaae tare tikimó mole *searó Sipsip* hupu male-tamo betere hosaamó daae mupa kelalepó. Atéró daae mulu, ʔei deróló sókó fatere kutirape deróo, olóu ʔarape tawóo erepó.

¹⁰ Téró, ai daae mole so whiné doasi fo fakeyóló duraalu,

“Tēteróló kaae tare *seamó* betere Kótóró *Sipsip* hupu maletamoné ʔa mo ti aluyaʔsóró tao su betere beteta, mo atimaamotórótipó,” yalepó.

¹¹ Ai daae mole *ensel*-rape fea, tēteróló kaae tare doasi betere tikikélé, kale whi disirapekélé, kale ʔouró betere ʔlarapekélé, bopéróló daae molepó. Tēteróló kaae tare doasi betere *sea* molepaae fetée fóló, Kótó betere aʔmó deraapisa fóló fió mulu duraalu,

¹² “Mo ʔapó.

Téyópóló yae! yóló, hale sóró horatere alakélé, mo ʔei ala wisikélé, tué tiki fosó fosó yóló dotoróʔ fole alakélé,

mo kée du betere alakélé,
doakale doi mulópóló du betere alakélé,
fea ala yaaire fotokʔ sʔmó bole alakélé
ʔa tēteróló kaae tare Kótópaae betere dokʔ fea yó tanópóló yae.

Mo kée. Téyópóló yae!” du betalepó.

13 Téro, kale teteroló kaae diliki yó mole whi disirapekó betané epaae woseturaalu, “I dei fọlo kuti deró betere so whirape-a, demaaté? Mopaae wale so whié?” yóló wosalepó.

14 Ti fo depa yalo apaae tokó mótu duraalu, “Doa whi-ó, naao ai tuére ape,” depa, kale sekéné epaae duraalu, “I daae mole so whi atimata, doasi sekéi ala hale beleté waletéin atima deró betere kutikélé *Sipsip* hupu male sameané fokale tikimó mo de ai erapa kelere?

15 Atéyale tikimó,

“Teteroló kaae tare Kótó ama *seamó* betepa, atima a beterepaae kese anóló bitu, ama momatere bemó mole ala detamokélé, dikitamokélé, hale erótu beterapó. Até du betepa, teteroló kaae tare doasi a betere tikimó bituraalu, ama atima wisiyóló beteropóló, kuti be tenótu betaalopó.

16 Atéru, wote dere alaró wei nokole dere alatamo momó kae yaalomei ai ape.

Suka supunékélé, mo hale supunékélé atimané tiki mo doraalomeipó.

17 Ti noatepae, teteroló kaae tare doasi betere tuamó daale *Sipsip* hupu maleta, hupu kaae tare whiné dere kaae, atima mo wisi yóló kaae tarapó.

Atima dape sóró mo ti betere bete tuamó wó tare wei nópóló alisóro faalo ai ape.

Atéro betepa, Kótóné atima kelemó dorowou betere wole kaape fea helekóló kópuraalopó,” yalepó.

8

Wẹike diriróló kinó betere ọla tukóló teraayale fo

¹ Téró, kale *Sipsip* hupu malené kinó betere wẹike ọla tukóló teraayalemó, ó hepen bemó fo mo sawakélé ini, hẹle hipa fi betepa suka kele 30-minit kemeyalepó.

² Atépa kelalemó, Kótó betere felekemó daae mole wẹikeró *ensel*-rapepaae ukulumó wuti betẹ betẹ yóló melalepó.

³ Atéró kelalemó, me *ensel*-né *kold* *kapané* aleale okopoi nuku tarepó. Ai nuku tómóta, felé kẹlaa wale fetera kaae ọla belerótua dapó. Ai ọla só wóló, simó sukulaa daróló momatere tikimó daapa, si keletómó biliratepa felé kẹlaa wisi wale ọla mené ẹpaae mo dekéró malepó. Ai felé kẹlaa wale ọlaró Talené kae beteró betere so whíné dere momatamo touróló, doasi betere *sea* molepaae anóló, *kold* *kapané* aleale momatere tikimó, Talepaae melaaí sóró walepó.

⁴ Téró, kale felé kẹlaa wisi sukuli kaae, *ensel*-né naase taaróló, Kótó beterepaae holalepó.

⁵ Téró, kale *ensel*-né okopoi nuku taruraalu, kale momatere tikimó duku betere si kelerape kẹae sóró nuku fẹanóló, i haepaae taae deralepó. Téyalemó, epée fitẹa yóo, doasi be sapalaa dorowóo, bao doasi yóo yalepó.

Kale wẹikeró ukulumó wutirapené haleraleti

⁶ Wẹikeró *ensel*-rape ukulumó wuti haleraai donoróló daae molepó.

⁷ Kale kolosale *ensel*-né ama ukulumó wuti haleralemó, halí ais kane kaae alée fóló dorowóo,

simiró sameatamo hosekényóló dorowóo, yalepó. Atéyaleteiné hae kwia sore moletei betá siné dukuraalu, tamo hae kwia hāle muni felepó. Nirapekélé atétóró yalepó. Nerapeta, fea siné doló sukulaa dalepó.

⁸ Téró, kale kolosale noma *ensel*-né ama ukulumó wuti haleralemó, doasi hasi fosó kaae ɔla siné doló kuló di wēi kēla tópaae taae deralepó. Atéyalemó, ai wēi kēla sore maanetei, tamo hāle belene furaalu, betá samea alée felepó.

⁹ Wēi kēla tuamó sore betere ɔla fake betá dóló sukunóturaalu tamo betepa taaralepo. Doasi wēi tómó kotere nukukélé tamo mupa taalóturaalu betá fake doralepó.

¹⁰ Téró, dou noma *ensel*-né ama ukulumó wuti haleralemó, samó daale doasi hore betá i haepaae si kaae dukulé dorowóló, doasi fole wēiró amale wēitamó tópaae dorowalepó. Atéyale tikimó, sore fake maanetei betá fake doróturaalu, tamo taaralepó.

¹¹ Ai dorowale horené doita, Hakesapó. Ai hakesapare wēirape nale tikimó, mo dekéró so whi sisiraafe felepó.

¹² Téró, kale dou *ensel*-né ama ukulumó wuti haleralemó, suka ke sore fake dēretei, betá fake dalemó dilikiyalepó. Hōrekélé, wéliékélé atétóró yalepó. Be dētamokélé tamo fake dēpatei, betá fake dilikiyóo, dikitamokélé, tamo fake sawa dēpatei, betá fake mo ti diliki yóo yalepó.

¹³ Téró, ɔlo kaafe tapatei, betá dukaa ó sá tuamó sé kutu bitu fo fakeyóló duraalu, “Kale hāle bití fale sore *ensel*-né ukulumó wuti haletepa, i haemó betó mole so whipaafe sekēi ala waaiemó mo

doasi, 'Wió yae! Wió yae!' I haemó betó mole so whirape-ó, diā mo wió yae!" du betalepó.

9

¹ Téró, kale apo *ensel*-né ama ukulumó wuti haleralemó, take ó samó i haepaae tokó dorowale horepaae mo apaae derepale wosono dolo tū *ki* mené apaae matepa kelalepó.

² Téró, ai sekéné mo apaae derepale wosono dolo tukiyalemó, kutó néli bilitepa, hotere sukuli kaae sokalepó. Atéro holale sukuliné sukaró satamo kinóló, be mo dilikiyalepó.

³ Téró ai sukuli dolomó, ero nusurape haepaae dorowalepó. Atimané whi tukó nukupa dotopo deretei, tō serekené tukó nukupa dere kaae yópóló, mené ā doasi fotokō melalepó.

⁴ Ai erorapepaae i fo yóló mulalepó. "I haemó yó mole nerape ó mepaae ere ɔlarape ó nirape momókó doraqse. I hae kwiamó betere atima kutirimó Kótóné siri erénire so whi maaté tukó nae," yóló mulalepó.

⁵ Ai ero nusupaae melale fotokōta, so whi mo ti sukópóló tukó néni, doasi dele sóró kaketu beterópóló, aporó wéliémó tuamó turukóló nukulé fu betae. Atétepa, dere dotopota, tō serekené tukó nukupa, dere kaae yaalopó.

⁶ Atétere sukamó, so whi fea sukāaitere tū kekāalotei, sukutere ala kelaaolomeipó. Atima mo ti sukunée deté fu betaalotei, ai tuamó sukutere ala mo muaalomeipó.

⁷ Téró, kale ero nusurape kelalemó, bōe dele faairaaalu, *hos* hupurape donoróló biture kaae erepó. Atimané topomóta, kale tēteróló kaae

tare doasiné deró betere *kold kapané* aleale topo tao kaae deróo, atimané kelepaakélé mo whiné kelepa kaae daayóo erepó.

⁸ Téró kale ero nusurapené topo nikikélé, sorapené niki kaae daayóo, atimané sekékélé *laiyonné* seké kaae daayóo epa kelalepó.

⁹ Atimané bopémó yale sene waqsóro, *aiyon kapa* wase kaae dakeró beterepó. Atima burá furaalu dere sépi haleta, *hos* hupuraperó atimané sjiyóló só kotere qlatamo bóe daai furaalu, dere diri fake hale kaae yalepó.

¹⁰ Atima disalené whi tukó nukupa dere dotopota, tó serekené tukó nukupa dere kaae dapó. Atimané so whi tukó nukuraalu, fe dée daalateré dotopomó kaketé fu betepatei, wélié aporó kemeyaalopó.

¹¹ Atima teteróló kaae tare topo whita, mo apaae derepale wosono dolomó betere *ensel* daalapó. Ai *ensel*-né ama doi Hibru foné Apadonipó. Krik foné Apoliyonipó.

¹² Folosóro waaire sekémó, wió yae yale ala kemeyalepó. Tépatéi, tamo waai hale mulapó.

¹³ Téró kale apomi *ensel*-né ama ukulumó wuti haleralemó, Kótó betere felekemó *kold kapané* aleale momatere tiki kwia dokómó daaté fale sekérapemó sókó wale fota, mo whiné dere fo kaae depa wosalepó.

¹⁴ Atéró yale foné kale ukulumó wuti tare apomi *ensel*-paae duraalu, “Kale doasi Yupretis fole weimó dokóló muló betere douró *ensel*-rape hale fópóló sókó daalae,” yalepó.

¹⁵ Atima ai douró *ensel*-rapeta, ba fomókélé,

wéliémókélé, be demókélé, sukakelemókélé, mo tukóló mulóló donoró betere be demótóró i hae kwiamó betó mole so whi sore fake beteretei, betā fake dōpóló dotonalepó.

¹⁶ Atéró, bōe daai kale *hos* hupu tómó betóló fele whirape fea, dokō sóró touróturaalu, 200 *milion*-pó (200,000,000) depa wosalepó.

¹⁷ Yālo nokenaró dere kaaené i ala epa kelalepó. Kale *hos* hupu tómó betó mole whirape atima bopémó sere bōe wase mo si kele kaae sonaa yóo, mepaae sukutā yóo, mepaae ti *sulpa* kaae, whé yóo, erepó. Ai *hos* hupuné topota, mo *laiyonné* topo kaae daalepó. Ai hupurapené kōlómó, simiró sukulitamokélé, si dokole kane *sulpa*-kélé atimané kōlómó sókó walepó.

¹⁸ Ai sore ɔlarape atimané kōlómó sókó wouraalu, i haemó betó mole so whi sore fake beteretei tamo taaróló, betā fake dóló kemeralepó.

¹⁹ Ai *hos* hupurape atimané fotokōta, kōlóró disaletamomó bulapó. Atimané disalerape mo wuli tiki kaae daalu, ama disale kwiamó topo daalapó. Ainé so whi tukó nukupa, doasi dele sua dapó.

²⁰ Kale whi dele ɔlané dóló mepaae taarale so whi atima naasené aleale kapala kótópaae tué tiki tiratere ala taaréni, hāle yó tarepó. Ti ai kapala kótórapeta, *kold kapanékélé*, *silpa kapakélé*, *brons kapanékélé*, mo kaponékélé, ninékélé, aleyóló daaló betepatei, atima kotere ala ó, wosetere ala ó, keletere alamo dumipó.

²¹ Atimané whi dele alakélé, kae kae hosó fokélé, nópu nokole alakélé, ɔlémi nokole alakélé fea taaróló kisipa feteni, hāle yó tarepó.

10

Aşere sóku belekqa male doasi fotokq bole ensel-né dqaе faróló tare fo

¹ Téró, me doasi fotokq bole *ensel* hepen be taaróló, i haepaaе dorowou betepa yálo kelalepó. Ai sekéné ama kutita, mo şakotóro deróo, ama topo tó sikimó sikipa doş filipaa yóo, ama kelepaakélé, mo suka de kaaе yóo, ama hşleke tamokélé, doasi ni tikimó si dukutere kaaе dó tawóo erepó.

² Ai sekéné ama naasené belekqamale aşere sóku dqaе faróló tarepó. Ama turu hşleke doasi weş kşla tómó daalóo, feş hşleke hae tómó daalóo epa kelalepó.

³ Atéru, ai sekéné ama dere fo faketa, *laiyon-né* keteré kaaе yalepó. Ama atéro fo faketeremó, weşkeró be sapalaané whşné fo kaaе depa wosalepó.

⁴ Atéro weşkeró be sapalaané yale fo yálo aşeş yaai yalemó, ó hepen bemó sókó wale foné duraalu, “Kale weşkeró be sapalaané yale fo aşeni kinae,” yalepó.

⁵ Take me hşleke weş kşla tómó daalóo, me hşleke hae tómó daalóo, epa kelale *ensel-né* ama turu naase ó hepen-paaе horó beterepó.

⁶ Atéru, şaró hepen-tamokélé, haekélé, weş kşlakélé, ai sore tikimó ere ala ó mole şlatamo, fea aleyale mo ti betó tare Talené doi yóló malotu duraalu, “Kaaе taté fole ala momó kae yaalomeipó.

⁷ Tépatei, nalo kale weşike *ensel-né* ama ukulumó wuti hale yaaire be de teópa kaaе taru, i ala yaalopó. Kótóné kinóló mole ala i ape yóló

ama kutó diratere kóló whīrapepaae deté wale fo dokonóturaalu, mo eróló kemeraalopó,” yalepó.

⁸ Téró, take hepen bemó sókó wapa wosale fonétei epaae momó duraalu, “Kale wēi kēlaró haetamomó hó daaló betere *ensel*-né dāae faróló tare asēre sóku sene fae,” yalepó.

⁹ Atétepa, e kale *ensel* daalepaae fóló, naao ai tare asēre sóku kwia sawakó emale melaaloé yóló wosalepó. Tétepa epaae duraalu, “Tao sóró nae. Atéró nukupa, naao kólómóta, meke fē felé kaae yaalotei, depe tuāmó feléni doyaalopó,” yalepó.

¹⁰ Atétepa, kale asēre sóku sawatamo ama naasené tapa, yālo tao sóró nalemó, kólómó meke fē felé kaae yaletēi, depe tuāpaae biṭi durupuraalu, yālo depe mo doyaalepó.

¹¹ Téró, epaae duraalu, “Kae kae tiki daale so whīkélé, kae kae *Gavman*-né tēteróló kaae tare so whīpaaekélé, kae kae be fo buó mole so whīpaaekélé, kae kae tēteróló kaae tare topo whīrapepaaekélé, mo so whīpaaekélé, Kótóné er-aaire ala i ape yóló, momó yó melae,” yalepó.

11

Kótóné yaaire ala i ape yóló yó matere whī tamóné yale ala

¹ Téró, dāle sere ọla kaae, kape siki mené epaae melóló duraalu, “Yā fóló, Kótópaae momatere beró Talepaae simó sukylaa dalatere tikitamo dāle sene fae. Téturaalu, ai be tuāmó touróló bitu, Kótóné doi sóró horótu betere so whīkélé dokọ sae,” yalepó.

² Tépatei, kale momatere be bolaare tipi tuʔ beta ɖale saʒse. Ti noatepae, ai belata, Juda meire fake so whimó meló betereteinépó. Kótóné ama mo kae tene be hulua wisinaale Juda meire fak-ené folokoleróló, hoko kutu betepatei, 42 wélié kemeyaalopó.

³ Téró, yaʒo du betere ala yó matere whi tamo yaʒo fotokʒ matepa, atimaamo dekemó deratere yei kuti deróló, Kótóné diʒpaae dere fo i ape, yóló yó maté kutu betepa, 1,260 be ɖerape kemeyaalopó.

⁴ Ti ai seké tamota, i hae kwia fea teteróló kaae tare Tale betere felekemó daale *Olip* ni tamo kaae daayóo, sʒ diri tamo kaae daayóo erapó.

⁵ Mepaae whi denétamo atimaamo doraai du betepa, ti atimaamoné kolómó sókó wale siné atima dó sóró mo ti aluraalopó. Mepaae whi dené ai seké tamo doraai kisipa mutepa, ti atimané ai dere alamó atimatei sukʒalo ai ape.

⁶ Kale seké tamoné bole fotokʒ etérópó. Kótóné atimaamopaae dere fo mo so whipaae yó matere be ɖemó, hali waʒsóró kinaaire fotokʒkélé sumó bolepo. I haemó belere weikélé samea alée falóo, yaaire fotokʒkélé sumó buóo, erepo. I haemó betó mole so whipaae kae kae dowi sekei alarape atimaamoné hekesere be ɖemó sumó eranérápó.

⁷ Atimaamoné kelale ala yó maté fóló kemer-ateremó, mo a dolopaae derepale wosono dolomó betere dowi syaae kaae ʒla sókó huturaalu, bóe dóló atimaamo teteróló mo ti sukópóló daalo ai ape.

⁸ Téró, ai seké tamoné tiki doasi doi mole be hulua tu hakeamó muaalopó. Ai be huluaamótóró

atimaamo teteróló kaae tare Tale filipaa ni tómó oleróló dalepó. Ai be huluapaae dó faróló, Sodom beró Isip haetamo kaaepó.

⁹ Atimaamoné tiki atéro hāle mupa, kae kae tiki daale so whinėkélé, kae kae fake so whikélé, kae kae be fo bole so whinėkélé, kae kae *Gavman*-né teteróló kaae tare so whinėkélé, sore be de kemeyóló dou be dené suka tuamó kēleta yópólópa douraose.

¹⁰ I hae kwia feamó betóló fale so whiné duraalu, “Atimaamo Kótóné kóló whi bitu, da dóló susupurótu betale seké tamo ti mulapa kelae yóló doka doka yaalopó. Téturaalu mo kée yóló, atimasisi wisi wisi ɔla u mótu i mótu du betaalopó,” yalepó.

¹¹ Tétu betaalotei, sore be de kemeyóló dou be dené suka tuamó daapa, Kótó betemó sókó wale fomo atimaamoné tiki tuapaae bitī derepaalopó. Téturaalu, kale seké tamo turukó holóló daane hotere kilitu, kale so whi atima winé sukóló diri furu furu yalepó.

¹² Atéro turukó holóló daapa, ó hepen bemó atimaamopaae fo fake yóló duraalu, “Ipaae holae!” deremó, atimaamoné bóe whīrapené kaae dilikiyó mupatei, hepen-paae huturaalu, sako dolomó buó deyalepó.

¹³ Até yale sukakelemótóro doasi bao duraalu, naase tamo be hulua eretei betā kolokó doropuraalu, aporó kemeyóló, me naase douró be hulua fake hāle erepó. Ai bao yaleteiné be kāturaalu, doló kemeraleso whi fea dokō sóró touróturaalu 7,000 so whipó. Até deremó, dini hāsókó fele so

whi atima winé sukutu, ó hepen bemó betere Kótó mo daalapóló doi sóró horótu betalepó.

¹⁴ Kale kolosale noma wió yae yale sekę wóló kemeyaletei, doų noma wió yae yale sekę betą mo felekemó waalo ai ape.

Węike dakeróló ukulumó wuti hale yaletei

¹⁵ Téró, kale węike *ensel*-né ama ukulumó wuti haleralemó, ó hepen bemó atimané doasi fo fakeyóló duraalu,

“Take i hae mené teteróló kaae taretei, fasó sóró mió dą teteróló kaae tare Taleró ama so whi teteróló kaae tare whi Kerisotamoné teteróló kaae tarapó.

Ai sekéné ama kaae tare ala kemeni, hąle yó tawaalopó,” yalepó.

¹⁶⁻¹⁷ Téró Kótó felekemó betere 24 whi disirape, atima teteróló kaae taru betere *sea* taaróló, haemó deraapisa fóló mulu Kótóné doi sóró horóló duraalu,

“Mo doasi fotokọ bole Tale Kótóo, yąta take bitiré wóló, miókélé hąle betereteiné dąné yąpaae mo kée dapó.

Ti noatepae, naao doasi bole fotokóné teteróló kaae tare ala kaae salepó.

¹⁸ I hae kwia feamó betó mole so whiné fopaae butu betepa, naao fopaae bole ala sókó walepó.

Sukąle so whikélé, naao kutó diratere kóló whirapekélé, naao kae beteró betere so whikélé, yąpaae wiyóló naao doi sóró horótu betere so whikélé, mepaae doi munire so whi ó doi mole so whi fea tale

yóló kwia melaaire be de sókó wóló i mole ape.

Ai be demótóró i hae dorótu betere so whikélé kwia melóló, doraalopó,” yalepó.

¹⁹ Atéyale kilipaae Kótóné hepen-mó tene momatere be tu tukwé fóló molepó. Atépa kelalemó, ai be tuamó ama so whi tao saalopóló, mo dirii fo aseyóló muló betere *bokis* molepó. Tériu, epée fitaa yóo, be sa kili kili yóo, doasi sapalaa dorowóo, bao doasi yóo, *ais* kaporó doasi besé tikitamo dorowóo yalepó.

12

Dowi wuli disóró betá sotamoné yale ala

¹ Mo doasi bete mole ala yaaiemó, me alapaae dó faróló hepen-mó epa kelale ala wisinaale i ape. Betá soné ama deró betere kutita, ti mo sukatóróti deróo, ama hó aomó wélié daayóo, 12 hqerape ama topo tao deróo, epa kelalepó.

² Téro kale soné ama ere naale ulumétépa saairaalu, kakóló sisó nuku beterepó.

³ Téro kale dere kaae, hepen-mó me alapaae dó faaróló depa kelaleti me i ape. Sonaai wuli doasi disó kaae betepa kelalepó. Ama topo weikeró daayóo, seké naase tamó daayóo, weikeró toporapemó doasi teteróló kaae tare topo whiné deratere topo tao kaae deróo, yó molepó.

⁴ Ai sekéné ama disale fépo yaletikimó, samó daae mole hqerape tamó fake hale daapatei, betá fake haepaae torokó dorowalepó. Atéro, kale soné ere naale seretamotóró tao sóró nó deraairaalu, mo felekemó melaa yóló beterepó.

⁵ Atépatei, kale soné naale só mulalepó. Ai naalenéta, *aiyon kapa* fake nópulu tawóló daalu, i hae kwia kae kaemó betóló fale so whi ama teteróló kaae tawaalopó. Kale soné ama naale seretamotóróti mo hapale Kótóné tao sóró ama teteróló kaae tare doasi betere tikimó ʔtamo betámó titiyóló beteralepó.

⁶ Téró kale so ʔ whikélé bitini, hʔle wópu mole haepaae botokó felepó. Ai haeta, kale so ʔ naale detepa, 1,260 be dɛ tuámó mené ʔ wisiyóló kaae tawópóló, Kótóné tukóló mulale tikipó.

⁷ Atéró, ó hepen bemó doakale bóe du betalepó. Maikel-né ama *ensel*-rape ipaae kʔayóo, kale disó kaae wuliné ama *ensel*-rape upaae kʔayóo, yóló bóe du betalepó.

⁸ Téyaleteti, Maikel-ró ama *ensel*-rapetamoné fotokóné kale disó kaae wuliró ama *ensel*-rapetamo doló teteróló hepen-mó betere alakélé mo ti kemeralepó.

⁹ Atéró, kale disó kaae wuli i haepaae sóró taae deralepó. Ai wulita, mo taketi bitiré walepó. Ama doita, bóe dele dowi kepe ó Satan-pó. Ai sekénétóró, i hae kwia feamó betó mole so whi, dowi tʔpaae ʔlisóró fu beterepó. Ai sekéró ama *ensel*-rapetamo i haepaae taae deralepó.

¹⁰ Téró, hepen bemó etei fo fakeyóló depa wosalepó.

“Dʔ teteróló kaae tare Kótóné tao sere alakélé, fotokʔ bole alakélé, ama so whi teteróló kaae tare alakélé, ama sóró beteró betere whi Kerisoné teteróló kaae tare alakélé, mió wóló mulapó.

Ti noatepae, betere dokɔ Kótóné keletómó dāné ne norape dɛtamokélé, dikitamokélé só derótu betere seké əkélé sóró taae deró beterapó.

¹¹ Kale *Sipsip* hupu malené samearó Talené atimané betere bete tuapaae erótu betere alatamo hakeamó yó mótu betalepó.

Atétu berteremó, atima dupakélé wiyóló taaréni, Kótóné ala betā hāle eraté fu betaletiné, ne norapetamo bóe du betale seké mo ti dóló tɛteralepó.

¹² Atéremó, hepen be tuamó betó mole whi diā mo kée yóló hāiné sinitu betae.

Tépatei, ɔ hepen be taaróló diatamo haepaae bitɪ dorowaleteiné diā haemó betó mole so whiró doasi wɛi kɛla tuamó betere so whitamó diā fea ‘Wió fo du betael’

Ti noatepae, ai sekéné ama yaaire ala doa be demó yaalo meipóló kisipa mutu, ɔ doasi fopaae butapó,” yalepó.

¹³ Kale dowi disó kaae wuli ɔ i haepaae sóró taae deró betepa kisipa mutu, kale naale deale so daai sya felepó.

¹⁴ Ai so ɔ bitɪ fópóló, Talené taketi donoróló muló betere whikélé bitini, hāle wópu mole tikipaae sɛ fópóló, doakale dukaané baase tamo ɔ melalepó. Atéró fóló betepa, wuliné ɔ me ala yaqsóró mepaae whirapené ɔ mo wisiyóló kaae taté fóló, ba fo sorené dou ba fo tuamó tukóló kemerópóló malepó.

¹⁵ Kale so atéró fupa, ɔ só fópóló dowi wuliné ama kólómó doasi fotokɔi wɛi tiki siriyó analepó.

¹⁶ Atéyalemó, kale so tao suraalu, haenétei kóló hāsóró holóló, ai wēi tiki nó deralepó.

¹⁷ Atéteremó, disóné kale sotamo mo doakale fopaae buturaalu, ai soné ama mepaae naale senaaletamo bóe daai felepó. Ti aita, Kótóné ama yae yóló muló betere foró, Yesuné ama yale alatamo mopóló erótu betere naale senaaletamopó.

¹⁸ Téró, kale disó kaae wuli ą fóló, wēi fókumó daalepó.

13

Doasi wēi kēla tuámó sókó holale syaae kaae ọla

¹ Téró ai wēi kēla tuámó syaae kaae ọla sókó hotepa kelalemó, topo wēikeró daayóo, sekérapekélé naase tamo daayóo, erepó. Ai sekérape tómó tēteróló kaae tare doasiné deratere topo taorape deró beterepó. Ai toporape dokómó Kótó faletere doirape aseýóló dakerótua yó molepó.

² Ai syaae kaae ọlata, mo *leapat* kaae aqrutei, ama hōleke ti *beané* hōleke kaae daayóo, kólókéle, *laiyonné* kóló kaae daayóo erepó. Téró, kale wuli disóné fotokókélé, ama tēteróló kaae tare alakélé, fea ala yópóló, sóró beteró betere alakélé, ai kale wēimó sókó holale ọlapaae malepó.

³ Ai kale syaae kaae ọlané toporapekó betámó, mo ti sukunei tọ daayaletēi, momó duniyale siri mupa kelalepó. Atére ala kilitu i hae kwia feamó betó mole so whi feané “Haió” yóló siraturaalu, kale syaae kaae ọlané ama dere alapaae tué tiki tiróló sya felepó.

⁴ Ai kale disó kaae wuliné kale syaae kaae ɔlané doasi fotokɔi ala yópóló sóró daalatare ala kolóló, so whi feané ai kale disó kilituraalu, “Aṭa mo doa Taletóró,” hɨtipó yóló, atima ʔ daale aɔmó sukóló bituraalu, ama doi hale horalepó. Atétu yale kaae, “I kale wɛimó sókó horale syaae kaae ɔlatamo de sure? Aṭamo mené bóe dele alakélé mo enénipó,” yóló dukirótu betalepó.

⁵ Téró, ai kale syaae kaae ɔlané bopé fake dere fokélé, Kótó faletere fokélé, so whi tɛteróló kaae tare alakélé, yópóló mené ʔ fotokɔ sɔmó melalepó. Ai seké ʔ ai ala yópóló sóró beteratepa, eraté fu bituraalu, 42 wélié tuamó eróló kemerópóló tɛ melalepó.

⁶ Ama kólómó dere foné Kótó eratare fokélé, Kótóné doi hɔko eróló faletere fokélé, Kótóné ama hepen bemó aṭamo betere whirape faletere forapekélé du betalepó.

⁷ Téturaalu, Kótóné atima dowi ala kemeróló kae betero betere so whitamó bóe daairaalu, keteke buló só deraaitépa seséni, ama yaaire ala betá yópóló taalalepó. Kae kae fakekélé, kae kae tiki daae mole so whikélé, kae kae be fo bole so whikélé, tɛteróló kaae dilikiyó mole hae kwiarapekélé, mo fea ama tɛteróló kaae tanópóló mené ʔpaae fotokɔ malepó.

⁸ I hae kwia feamó betó mole so whiné, kale syaae kaae ɔla aɔmó sukóló bitu, “Yṭa Talepó,” du betaalo ai ape. Ti atimata, kale *sipsip* hupu malené mo ti betó tare *buk*-mó doi asɛnire so whipó. Ti ai *Sipsip* hupu maleta, i hae kwia keké naaipatei, dópólópó yóló muló betere hupu malepó.

⁹ Mepaae whi de woséli daapata, ti i dere fo wosóló tué muópóló yae.

¹⁰ Whi me detamo bóe duraalu, wae sóró *dipula* beteraalopóló tukóló muló betepa, ti mo atétóró yaalopó.

Whi me de bóe whiné bóe dele sepakené dōpólópó yóló muló betepa, ti mo sepakenétóró daalopó.

Até yaairemó, Kótóné kae beteró betere so whipaae sekēi alarape wapakélé, haepaae derepēni, diriyóló bitu, Talené ama ala betā ketekē buóló eró tawae.

Hae tuqmó sókó holale syaae kaae ɔla

¹¹ Téró ɔalo kelalemó, hae dolomó syaae kaae ɔla me sókó horalepó. Ai sekéné ama topomóta, *Sipsip* hupu malené seké kaae daalutei, ama dere fo wosalemó, kale wuli disóné fo kaae yalepó.

¹² Kale haemó sókó horale syaae kaae ɔlapaae folosóró wēmó sókó horale sekéné ama tēteróló kaae tare ala melalepó. Atétepa, nalo wale sekéné ama tēteróló kaae taru, kale folosóró wale sekéné doi eróturaalu, i haemó betó mole so whi feané kale sukītei tokóló doasi siri mole sekēpaae Tale-ó, yóló doi sóró horópóló sētu betalepó.

¹³ Ai kale sekéné amatei mo doakale kae kae kelemei alarape eróturaalu, so whi feané keletómó sikélé ó hepen be taaróló i haepaae dorowópóló erótua yalepó.

¹⁴ Kale folosóró wale sekéné doi doasi mulópóló mené ɔ fotokɔ sumó matepa, kae kae kelemei alarape erótu betalepó. Téturaalu, i hae kwiamó betó mole so whi fea dilikóló kōpaae falatua

yalepó. Téró, kale haemó sókó holale sekéné i haemó betó mole so whīpaae duraalu, sepake daayale tikimó doasi siri mole sekéné ama doi doasi muópóló, ama aso sūróló aleale ɔla daalae, yóló mulalepó.

¹⁵ Téró, kale folosóró wale seké sūróló aleale ɔlané fo yópóló, fomo bulaaire fotokɔ mené haeró sókó holale seképaae malepó. Atépa, i hae kwiamó betó mole so whīné ai asopaae, Tale-ó yóló doi sóró horénitere so whī dópóló, haemó sókó horale sekéné fotokɔ sumó bulalepó.

¹⁶ Ai sekéné, doasi doi mole whī ó doi munire whīpaaekélé, néli whī ó yoleale whīpaaekélé, hāle kōleaané betó mole whī ó wae sóró kutó diratere whīpaaekélé, atimané turu naasemó ó kutirimó siri erópóló yae yóló so whī feapaae seɣyalepó.

¹⁷ Ai siritamo munipa, ti ɔla dupu dere alakélé, ó dotonatere alakélé, mo yaalo meipó. Ti ai sirita, kale syaae kaae ɔlané ama doi ó ama doipaae fó faróló ere *nambapó*.

¹⁸ Ti etei alata, mo hāle whīné tuéyaalo meitei, mo tué tiki fosó fosó yóló dotoróɛ fale whīné betá sumó taleyóló bete tuénérápó. Whī me detamo, ama tué tiki fosópa, ti kale syaae kaae ɔlané *namba* taleyóló bete tuénérápó. Ti ai *nambata*, mo whīné *namba*-pó. Ai sekéné ama *nambata* 666-pó.

14

Sipsip hupu maleró 144,000 so whīrapetamoné yale ala

¹ Téró ɣalo kelalemó, ɛ daale felekepaae anóló Saion hasi fosómó kale *Sipsip hupu male daapa*

kelalepó. Aimó 144,000 whirapekélé, atima betamó daae molepó. Ai whirape atimané kutirimóta, kale hupu malené doikélé, Alimané doikélé aseýóló dakeró beterepó.

² Téró yało wosalemó, hepen bemó sókó wale haleta, wẹi dou k̄atu dere hu kaaeró be sapalaa dorowale hale kaaetamo depa wosalepó. Meta, *kita* kaae ɔlarapené dere hale kaae depa wosalepó.

³ Téró, u kale whirape atimané kale t̄eteróló kaae tare doasi betere tikipaaekélé, ą bopéróló betó mole douro betere ɔlarapepaaekélé, whi disirapepaaekélé, kese anóló daae muluraalu, kae kisi wole fo du betalepó. Ai wole fota, h̄ale mo whiné tué yóló enénipó. I haemó dowi kwia saqsóro Kótóné tao sóro dupurale 144,000 whirapené bet̄a tué yóló enérápó.

⁴ Ti ai daae mole whirapeta, sorapetamo folokolei ala initu detere kaae, i haemó mole alatamo hosekénire whirapepó. Ti noatepae, atimané betere ala folokole yaqsóro ó me alatamo hoseké yaqsóro mo hotowayóló kaae tawaleteinépó. Ti ai whirapeta, *Sipsip* hupu malené dere ala sya fóló erótu beterapó. Ai whirape atimata, h̄ale mo so whi kuamó betó mupa, dupuróló Kótóro *Sipsip* hupu maletamopaae kale kutómó folosóro ɔlumé dere ɔla, Talepaae h̄ale matere kaae yóló melale 144,000 whirapepó.

⁵ Atimata, kapala fo sawakélé muniru, me h̄asókó fole alakélé inire whirapepó.

Sore ensel-rapené yale ala

⁶ Téro yało kelalemó, *ensel* me kae ó samó sê kutu betepa kelalepó. Ai sekénéta, mo titóróti hãle betó tawaaire kisi fo wisi, i hae kwia feamó betó mole so whĩpaae yó melaairaalu, tarepó. Ti ai fota, betã fake so whĩpaae maaté yó melaai mei, kae kae *Gavman*-né teteróló kaae tare so whĩpaaekélé, kae kae fake so whĩpaaekélé, kae kae be fo bole so whĩpaaekélé, kae kae tiki daae mole so whĩrapepaaekélé, yó melaaire fo wisipó.

⁷ Téro ama fo fake yóló duraalu, “Kótópaae winé sukuturaalu, ama doi betã doasi doi muópóló erae. Ti noatepae, ama fo tokótamo yóló tale-turaalu, kwia melaaire suka kele i sókó wale ape. Térapa, ă aqómó sukóló bituraalu, ‘Aya Tale doasi-ó,’ yóló, ama doi betã sóró horótu betae. Ti amata, hepen beró sãtamokélé, haekélé, doasi wẽi kėlakélé, fole wẽirapekélé aleyóló muló betereteinépó,” yalepó.

⁸ Ai fo yale *ensel* folosóró fi tikimó, *ensel* me kae nalo sya fu bitu duraalu, “Kolokóló dorowóló a mole ape. Doakale doi mole Babilon be hulua kolokóló dorowóló mulapó. Ti ai nópu nokole so Babilon-néta, ama nópu nokole alané aleale keyaa fole *wain* wẽi hae kwia kae kaemó betó mole so whĩ feané nópóló melótua yale so, mió kolokóló dorowóló ai mole ape,” yalepó.

⁹⁻¹⁰ Téro kale dere kaae, ai *ensel*-tamo fi tikimó, *ensel* me kae sya fu fo fakeyóló duraalu, “Mepaae whĩ detamo, kale syaae kaae ɔlapaae ó ama aso kaae ɔlapaae, ‘Doa Tale-ó,’ yóló aqómó sukóló bitu, atima kutirimó ó naasemó, ai ɔlané siri eró betere whĩrape ama doakale fopaae buló kwia matere wẽi nópóló melaalo ai ape. Ai *wain* wẽi mo

węitamo hoseké ini, mo *wain* węitóró Kótóné fopaae butu kwia melaairetei, wutimó tepeyóló mulapó.

¹¹ Atéró atima duku bituraalu, hotu betere sukulita, mo hăle holótóró tawaalopó. So whı de kale syaae kae ęlaró ama aso kaae ęlatamoné, doi sóró horóo, ama doi mole siri sóo, ere so whı atima dętamo ó dilikitamokélé, sęa nóló betere ala mo yaalomeipó,” yalepó.

¹² Kótóné kae beteró betere so whıné, ama yae yóló muló betere fo aqmó sukóló bitu, Yesuné ala eraté fu betaalopó. Ai tuamó i kale bope yale sekęi alarape wapakélé, haepaae doropóló taaréni, hăle beleté fu betereteiné ai ala mo sumó eranérapó.

¹³ Téro, hepen bemó i fo depa yălo wosalepó. “I fo aseyaе. Mo mió kaaе sóró Taletamo betamó betere so whı sukutepa, ti atima Talené mo wisiró beterapó,” yalepó. Kale Dęi Kepe Wisiné duraalu, “Mo dapó. Ti atimané depe tukó wei ala du beteretei taaróló, sęa nóló bituraalu, atimané yale alamó dupu saaire ala felekemó yaalo ai ape,” yalepó.

Haemó yó mole ęla ęlumétepa turukóló saairetei

¹⁴ Téro yălo kelalemó, ę daalepaae anóló mo dęi săko tómó, whıné naalema kaaе betepa ke-lalepó. Ama topomó, tęteróló kaaе tare doasiné deró betere *kold kapané* aleale topo tao deró bituraalu, ama naasené ęla ęlumétepa turukó suatere hekemée wei fosói sepake tarepó.

¹⁵ Tépa, me *ensel* momatere bemó sókó wóló, kale săko tómó betere sekępaae fo fakeyóló duraalu, “Naao tare sepakené kale ęlumére ęlarape

turukóló sae. Ti noatepae, mió ɔla ɔlumépa saaire be de i sókó wale ape,” yalepó.

¹⁶ Tétepa, kale sekéné tare sepakené i haemó ɔlumé yó mole ɔlarape fea felesé yóló turukó salepó.

¹⁷ Téró, me *ensel*-nékélé, hekemée wei sepake fosói tawóló, hepen-mó tene momatere bemó sókó walepó.

¹⁸ Atépa, Talepaae matere ɔla sukɔlaa dalatere tikimó si kaae tare *ensel* sókó wóló, kale sepake tare *ensel*-paae fo fakeyóló duraalu, “Naao ai tare sepake fosóné i haemó yó mole *wain* képi durape ɔlumérapa, sepemó tukóló siré kwɛae,” yalepó.

¹⁹ Tétepa, kale *ensel*-né ama sepakené i haemó yó mole *wain* képi du felesé yóló turukó siré kwɛyóló, kale képi du dɔtere doasi tikipaae taae derafe fae. Ti kale képi du dɔtere tikita, Kótóné ama fopaae bole ala kwia melaairaalu, dɔtu betere tikipó.

²⁰ Doasi be hulua aɔró *wain* wei dɔtere tikipaae taae deratepa, atimané teiya teiya yaletikimó, samea doasi sókó felepó. Atéró sókó fele sameata, wei kaae dukulé holóló, *hos* hupuné ɔlo aɔmó depa sale dɔleta, 300 kilomita sɔpó.

15

Wɛikeró ensel-rapené wɛikeró doasi sekei alarape tapa kelaletēi

¹ Téró ɔlo kelalemó, hepen bemó mo doasi bete mole ala wisinaale yaairemó dere ala epa kelalepó. Ai kale kelale alata, i ape. Wɛikeró *ensel*-rape dokɔ mo kemeróturaalu so whi feapaae dowi sekei ala melaaire wɛikeró tapa kelalepó.

Ai kemeróturaalu dere fota, ti Kótóné ama fopaae buóló kwia melaaire alarape mo ti kemeróturaalu, i wēikeró alarapené kemeraalopó.

² Téró yało kelalemó, *klas-ró* sitamo hōsekéróló aleale wēi kēla kaae belerepó. Ai wēi fōku dēmóta, so whī mo fea hāle ọla kaae daae mupa kelalepó. Ti aimó daae mole so whīta, kale syaae kaae ọlaró ẹ sūróló aleale asotamokélé, ama doimó sere *namba-kélé*, ai alarapetamo bōe dóló tẹteróló wale so whīpó.

³ Kótóné ai daae mole so whīpaae male *kita* kaae ọlarape taruraalu, Kótóné kutó diratere whī Moses-ró kale *Sipsip* hupu maletamo dolḡanóló du betale wole fo i ape.

“Mo doasi fotokọ bole Tale Kótóo, naao du betere alata, mo doasi sira yaai dere ala du beterapó.

Take keké nale alimó kaae sóró bitiré waleteikélé, mió i alimó bitiré faaireteikélé, tẹteróló kaae tare Tale-ó, yaṭa, naao ere alatóró sya furaalu, mo dono taletu beterapó.

⁴ Tale-ó, whī me de yaṭpaae winé sukutu, naao ere alamó naao doi doasi muaalomeipóló de?

Betḡ whīkélé ya kaae bitini, yaṭa dowi alakélé muni, mo kae betere Talepó.

Kae kae hae kwiamó betó mole so whī ya beterepaae wóló, ya aqmó sukóló bitu, Doa Tale-ó yóló dukirótu betaalo ai ape.

Ti noatepae, naao mo donoyóló taletu betere alarape take hiróló mualetei, mió so whī feané kolópóló hakeamó muló beterapó,” yalepó.

⁵ Ai alarape yóló kemetepa kelalemó, ó hepenmó momatere be tų tukwę fóló molepó. Ai momatere beta, Kótóné ama so whı tao saalopóló dirii fo muló betere kuti bepó.

⁶ Téró kelalemó, kale wẹikeró *ensel*-rape atimané wẹikeró sekẹi alarape tawóló ai momatere bemó sókó walepó. Atimané deró betere kutita, mo dẹ tekée fóló kasa kasai *linen* kuti deróo, *kold kapané* dokale to atimané deró betere kuti tẹteróló bopemó sóo, epa kelalepó.

⁷ Téró, kale douró betere ọlarapekó betané kale wẹikeró *ensel*-rapepaae *kold kapané* aleale wẹikeró okopoi nukurape dokọralepó. Ai nukurapemó, mo ti betó tare Kótóné ama kwia melaaire fopaae butere ala fayóló molepó.

⁸ Kótóné ama ere ala wisinaale hakearatere alaró ama doasi fotokọtamoné momatere be dolomó sukuli kaaróló fẹaneteiné, whı fókélé mo enénipó. Kale wẹikeró *ensel*-rapené tare wẹikeró dowi sekẹi alarape melóló kemenipatei, ai be dolopaae folo hapale honénipó.

16

Kótóné fopaae bole ala belere okopoi nukurape

¹ Téró yalo wosalemó, momatere bemó sókó wale foné kale wẹikeró *ensel*-rapepaae fo fakeyóló duraalu, “Kótóné fopaae buluraalu kwia melaaire ala okopoi nukumó beleróló diaaọ ai taretei, haepaae sunée derẹle fae,” yalepó.

² Ai fo depa, kale kolosale *ensel* fóló ama tare okopoi nukumó belere ọla sóró fóló, haepaae sunée deralemó, kale syaae kaae ọlané siri eróló,

ama aso aqomó sukóló betó mole so whiné tikimó, dotopo yóló mo doasi dele su betaaire sonaalei humu fulu deralepó.

³ Téró kolosale noma *ensel*-né ama tare okopoi nukumó belere ɔla doasi wɛi kɛlapaae sunée deralemó, kale wɛi mo sameatóró alée felepó. Ai sameata, mo ti sukale whiné samea kaae hokoloipó. Até yaletikimó, wɛi kɛla tuamó betó mole ɔlaraperó ere ɔlarapetamo mo fea sisiraae felepó.

⁴ Téró, kale dou noma *ensel*-né ama tare okopoi nukumó belere ɔla, doasi fole wɛiró amale wɛirapetamopaae sunée deralemó, samea alée felepó.

⁵ Téró yalo wosalemó, kale doasi fole wɛirape kaae tare *ensel*-né duraalu,
“Naao taletere alata, mo donotóró tale yóló kwia materetei mo wisirapó.

Ti noatepae, yata takekélé betóo, miókélé betóo iru, dowi ala mo betakélé munire Tale beterapó.

Téru, fo tokótamo yóló tale yóló kwia matere alata, mo donoyólótóróti ai yale ape.

⁶ Ti noatepae, naao kae beteró betere so whiró naao fo eratere kóló whirapetamo dale kwia tokó móturaalu ai sókó fele samea nópóló materetei, mo donorapó,” yalepó.

⁷ Téró yalo wosalemó, Talepaae moma yóló simó sukulaa dalatere tikimó etei fo yalepó.

“Mo doakale fotokó bole Tale Kótó-ó, yata mo fotóró bulu, naao tale yóló kwia matere alakélé mo donotóró dapó,” yalepó.

⁸ Téró, kale dou *ensel*-né ama tare okopoi nukumó belere ɔla suka betepaae sunée deralemó, siné so whi dolo baalu sorokó faaire fokó mené sumó melalepó.

⁹ Atéro dokole si supuné atima tiki turó baalu sorokó felepó. Até dere supumó, Kótóné doi doróló a eratere fo du beterepó. Atimapaee atei kaae susupui ala eratepatei, atimané du betere dowi ala taaróló, tué tiki fetenipó. Téruraalu, Kótóné doi doasi muópóló eraaire alakélé hýýóló, dowaae fu betalepó.

¹⁰ Kale apo *ensel*-né ama tare okopoi nukumó belere ɔla, kale syaae kaae ɔlané teteróló kaae tare tikimó sunée deralemó, ai hae kwia fea dilikiyó felepó. So whi supumó atéro kakutu bitu, atimané hapetei turukóló nuku betalepó.

¹¹ Atimané tikimó daae mole humu dotoporó siné dale deteraatamomó kakutu bituraalu, hepen bemó betere Kótóné doi doróló, tekani fo du betalepó. Tétu, atimané yale dowi ala taaróló tué tiki feteyóló betaalo hýýóló, dowi ala yaaitei dowaae fu betalepó.

¹² Kale apomi *ensel*-né ama tare okopoi nukumó belere ɔla doasi fole Yupretis weipaae sunée deralemó, kale suka hoterepaaeróló teteróló kaae dilikiyó mole topo whirape waaire tu mulóturaalu, kale weí tiki dikalepó.

¹³ Téró yalo kelalemó, sore dowi keperape sepéerape kaae beterepó. Ai dowi kepe atima, me wuli disóné kólómó sókó wóo, me syaae kaae ɔlané kólómó sókó wóo, me Kótóné fopóló kapala fo yó matere whiné kólómó sókó wóo, yalepó.

14 Ti ai keperapeta, kae kae kelemei alarape erótu betere sekērapepó. Doa fotokō bole Tale Kótóné ama tukóló muló betere doasi be demó, Taletamo bōe daaire whīrape mei yaqsóro, i hae kwia feamó tēteróló kaae dilikiyó mole topo whīrapepaae bōe daalopa ape yóló, dape siré kutu beterapó.

15 “Tērapa ēta, olémi nokole whī kaae waalo ai ape! Atéyaalopa, whī me de noke fió muni turukó holóló bitu, ama deratere kuti a betere tikimótóróti muló betae. Atétere whī a Talené wisiró beterapóló haíné sukāalo ai ape.

Ti noa yaqsóro mei, ama tiki daapi hāle furaalu hale yaqsóro dapó,” yalepó.

16 Téró, atima fóló kale topo whīrape dape siré kwēyóló, Israel fake so whīné Hibru foné doi muló betere, Armakedon haepaae tourāle walepó.

17 Téró kale wēike *ensel*-né ama tare okopoi nukumó belere ọla sà tó tuamó sunée deralemó, kale momatere be tuamó tēteróló kaae tare doasi betere tikimó fo fakeyóló duraalu, “Mió ai kemeyale ape!” yalepó.

18 Ai fo yalemó, epée fitāa yóo, be sà kili kili yóo, doasi sapalaa dorowóo, mo doasi bao yóo, yalepó. Take i haemó betale so whīné etei kaae bao depa mo kilinipó.

19 Ai bao duraalu, kale doasi be hulua tekeyóló sore fake daane fío, i hae kwia feamó tē mole doasi be huluarapekélé kolokóló doropóo, yalepó. Kótóné kale doasi doi mole Babilon tuē muturaalu, ama dowi fopaae bole *wain* wēi wutimó tepeyóló, kale so nópóló melalepó.

²⁰ Wēiné bopéróló daae mole hae kwia fea daani, alu yó molepó. Doasi daae mole hasi fosórapekélé kelalemó daani, aluyó molepó.

²¹ Ó sāmó doasi *ais* kapo du kaaené whīrape tēiya yaai dorowalepó. Ai dorowale *ais* kanerape sekē dāleta, 50 *kilogram*-pó. Atimapaee atei mo dowi sekēi ala erateremó, Kótó eróló tekani fo du betalepó.

17

Syaae kaae ɔla tómó betere somó yale fo

¹ Téró, kale wēikeró okopoi nuku tare *ensel*-rapekó betā ɛ beterepaae wóló duraalu, “Kale wēirape tómó betere doasi doi mole nópu nokole soné dere alamó, kwia melaairetei yālo yāpaae yó melaalopa ape.

² Ai sota, i hae kwia fea tēteróló kaae tare topo whīrapetamo nópu nuku betalepó. Téró, kale soné i hae kwiamó betó mole so whīkélé, nópu nokole *wain* wēi melale tikimó topo doyóló keyaa fu betalepó,” yalepó.

³ Téró, ɛ kale Dēi Kepe Wisi tuāmó betepa, *ensel*-né so whīkélé bitini hāle kópu kaae fi tikipaae beleyóló sóró felepó. Aimó bituraalu kelalemó, betā so mo sonaai syaae kaae ɔla tómó beterepó. Ai syaae kaae ɔlané ama tiki turó, Kótó aqratere doirape aseyó bopéróo, wēikeró toporape daayóo, naase tamo sekērape daayóo, epa kelalepó.

⁴ Kale soné ama kutita, mo sonaairó sukutaitamo deróo, ama aure ɔlarapekélé, *kold kapané* alealeteiné hōre hōre yóo, mo doasi *moniné* sere kasa kasai kaneró du dui

meleketamo sóo, erepó. Ama naasené tare *kold kapané* aleale wuti dolomó kelaalokélé mo sonaalei ɔlaraperó ama nópu nokole alané bólutamó deyóló faanó beterepó.

⁵ Ama kinóló mole doi kutirimó asereitei i ape.

DOASI BABILON-TA, NÓPU NUKU BETERE SORAPERÓ I
HAEMÓ MOLE KELAALO MO SONAALEI
ALARAPETAMONÉ HAMAPÓ.

⁶ Téró yalo kelalemó, Kótóné ama kae betero betere so whi atimakótei, mepaae Yesuné yale ala i ape yóló yó melateremó dale so whiné samea naletikimó kale so a topo doyóló keyaa fu beterepó. Atétere ala kolóló, e sira yale supó.

⁷ Atétepa, kale *ensel*-né epaae duraalu, “Yá noatepa siratu bitute? Ai weikeró topo daayóo, naase tamo seké daayóo, ere syaae kaae ɔlaró ama sisó tómó betere sotamoné kinóló mole ala bete yalo yapaae hakearóló yó matapa wosae.

⁸ Naao kelale syaae kaae ɔlata, take betaletēi, mió bitinipó. Tépatēi, take mo apaae derepale wosono dolomó sókó holóló, a doraai dale muló betere tikipaae faalo ai ape. Mepaae so whi i haemó bitu, atimané doi take keké nale alimótei mo ti betere *buk*-mó munipó. Atére so whiné kale syaae kaae ɔla kilituraalu, doasi sira yaalopó. Ti noatepae, take a betepa kolóo, mió bitini alu yóo, nalo momó sókó wóo dereteinépó.

⁹ Naao ai kelale alata, mo kisipa tiki fosó fosóyóló dotoróe fale whiné betā bete tokóló kolóló tuénérápó. Kale weikeró toporapeta, ti kale soné ama ero dée daalóló betere weikeró hae durapépó.

¹⁰ Me beteta, ti kale teteróló kaae tare weikeró

doasi topo whīrapepó. Ai weikeró whīrapekó, aporó whīrape atimané tēteróló kaae tare ala kemeyalepó. Até yóló betā whīné tēteróló kaae tare ala betā hāle erapó. Atépa, nalo me whī wouraalu, ama tēteróló kaae tare ala sawa sukamó maaté kaae tawaalopó.

¹¹ Ai kale syaae kaae ɔla take betaletēi, mió bitinipó. Ata kale tēteróló kaae tare weikeró doasi topo whīrapekóte, ɔkélé atimatamo touróturaalu bokówalerópó. Ai weikeró topo whīrapetamo betāmó beteretei, ɔ doraai tukóló muló betere alapaae fu beterapó.

¹² Naao kelale naase tamo sekérapené beteta, naase tamo tēteróló kaae tawaaire doasi topo whīrapepó. Ti mió atimané tēteróló kaae tawaaire ala sini, téyópó. Take atima doasi doi muópóló mené sóró beteraalopó. Atéro sóró beteratepa, kale syaae kaae ɔlatamo betā bitu, sawa sukamó tēteróló kaae tawaalopó.

¹³ Atima fea mo betā kisipatóró muóló, kale syaae kaae ɔlapaae naaotóro kaae tawae yóló, fotokóro tēteróló kaae tare alatamo melaalopó.

¹⁴ Ai fakerape atima touyóló kale *Sipsip* hupu maletamo bóe daalopó. Téyaalotei, kale *Sipsip* hupu malené atimatei dóló tēteraalopó. Ti noatepae, ɔta i haemó betó mole talerape tēteróló kaae tare Tale betóo, mepaae hae kwia tēteróló kaae tare topo whīrape tēteróló kaae tare topo whī betóo, erapó. Atéru, ɔ sya fóló ama ala eró tare so whīta, ti ɔtamo betāmó betaalopó. Atimata, ama ape yóló sókó su yóló, kae beteró betere so whīpó,” yalepó.

¹⁵ Téró, kale *ensel*-né epaae duraalu, “Kale nópu nokole so betere weirapené beteta, i ape. Kae kae tiki daae mole so whikélé, kae kae touró betere fakekélé, kae kae *Gavman*-né teteróló kaae tare so whikélé, kae kae be fo bole so whikélé mo fea tómó, ai so ʔ beterapó.

¹⁶ Kale syaae kaae ɔlaró naase tamo sekérapetamoné kale nópu nokole so hóróló, bóe daalopó. Atéturaalu, ama kuti fea sorokóló taae faróló tiki daapi hāle betepa, ama tiki mi fea sorokóló nóló diri hāle simó sukūlaa dópóló biliraalopó.

¹⁷ Ti noatepae, kale naase tamo sekérape atima fea fo dokóló betā tué mutu, atima teteróló kaae tare fotokō kale syaae kaae ɔlapaae melaalopó. Até yaaire alata, Kótóné ama eraalopó yóló muló betere fo dokonótu mo erópóló, atima tuāpaae bulaalopó.

¹⁸ Naao ai kelale sota, i haemó betó mole topo whirape teteróló kaae tare doasi doi mole be hu-luapó,” yalepó.

18

Babilon kolokóló derepele fo

¹ Ai ala yóló kemetepa, me *ensel* hepen bemó dorowou betepa kelalepó. Ai sekéné, fea ala ama teteróló kaae tawóló beterópóló, mené ʔ sóró beteró beterapó. ʔ tuāmó ere kokóné sini de wisinaale i hae kwia feapaae dēralepó.

² Téró, kale sekéné mo doasi fo fakeyóló fotokōiné duraalu,

“Ai kolokó dorowóló mole ape! Kale doasi doi mole be hulua Babilon kolokóló dorowóló mulapó.

Ti ai sota, dowi keperape betere be alée fóo, mepaae kae kae dowi keperaperó hòkolo yóló kelaalo mo sonaalei barapetamo, betere tiki alée fóo erapó.

³ Ti noa betené mei, hae kwia kae kaemó betó mole so whì ai soné ama nópu nokole ala tokóló yateiné *wain* wèi nóló, keyaa fu dere kaae du betalepó.

I hae kwiamó betó mole so whì teteróló kaae tare topo whìrapekélé, kale sotamo nópu nukua yalepó.

Ai soné ama doasi nélire alané, i hae kwiamó ọla ọla dotonóló duputu betere so whìné *moni* mo dekéro siré feleteiné néli whì betalepó,” yalepó.

⁴ Téró hepen bemó me i fo depa wosalepó. “Yalo so whì-ó, ai sotamo betere so whì kua dolomó beteretei taaróló sókó ape.

Ama du betere dowi alarape diàpaae tokó melóturaalu, ama saaire dowi sekei alarape diàkélé saqsórópa, taaróló ape.

⁵ Ti noatepae, ai soné Kótóné yóló muló betere fo tikale dowi ala muté holóló, hepen bepaae sókó horapó.

Atéremó, melaaire dowi kwia Kótóné keteréni, kisipa hāle yó tarapó.

⁶ Kale soné ama melatua yale wèi àpaae tokó mótu, ama male sù tómó me beleróló àtei nópóló melae.

⁷ Kale so ă doasi doi mulapóló, wisi wisi ęla dekeró nuku betale sųtóró, susupui alaró dekené sukutere alatamo sópóló melae.

Ama tuę tiki tuămó bopé fake dere ala bulu, ‘Ęta, mo doasi tęteróló kaae tare topo so betereteiné ę wulia so betepapakó woletere ala enénipóló,’ kisipa mutu beterapó.

⁸ Atéreteiné, mo betă sukamó ama sópóló ďale muló betere sekęi alarape ęsókó feni, mo saalo ai ape.

Ai alarapeta, i ape. Sukutere alakélé, dekené sukuturaalu wole yaaire alakélé, wotené sukutere alakélé, tiki siné dóló sukųlaa dokole alakélé, ai ala fea mo amatóró saalo ai ape.

Ti noatepae, ai somó dowi kwia melaaire Tale Kótóta, mo doasi fotokę bole bete Talepó,” yalepó.

⁹ Ai sotamo nópu nokole ala yóo, ama wisi wisi ęla sóo, du betere tęteróló kaae tare topo whįrapené ai kale so dukuraalu, hotere sukuli kelalepó. Atétepa, atima kale so dekené sukóló woletu betaalopó.

¹⁰ Kale so atéró duku bitu, susupu sóró kaketu betere alamó, atima wituraalu, tika mo umó daae mulu, i fo yaalopó.

“Mo doa wió! Doasi doi mole be hulua-ó, wió yae! Doasi fotokę bole be hulua Babilon, yă do-raalopóló tukóló muló betere alata, betă sukakelemótóró mo ti doróló ai kemeyale ape.”

¹¹ I hae kwia feamó ęla ęla dotonóló duputua yale whįrapené kale so dokole kolóló, dekené

sukuturaalu, moló-u yaalopó. Ti noatepae, atimané ɔla ɔlarape take yale kaae whɔrapené momó kae duputimipó.

¹²⁻¹³ Atimané atéro dotonótu betere ɔla ɔlarape i ape. *Kold kapa*, *silpa kapa*, doasi *moni* sere kasa kasai kanerape, meleke kaae, du dui ɔla, *linen* kuti wisinaale, sukutai kuti, *silk* kuti, sonaai kutikélé, fetera kaae ɔla *sitron* nikélé, hupu sekéné aleale kae kae ɔlakélé, doasi *moni* sere nikélé, *brons kapa*, *aiyon kapa*, be tɛtere kane fake wisinaalekélé, *sinamon* fetera kaae ɔlaró mepaae kae kae fetera kaae ɔlatamokélé, simó bilitepa felé kɛlaa wale ni sekaɛ kaae ɔla mura ni fɛkélé, *frenkensense* ni fɛkélé, *wain* wɛikélé, *Olip* ni duné aleale *welkélé*, *flawa* wisinaaleró *whitamokélé*, *bulmakau* hupuró *sipsip* huputamokélé, *hos* hupuró ama sɔyóló só kotere ɔlatamokélé, wae sóró kutó diratere so whɔró hɛle mo betere so whɛtamonné tikiró asotamokélé dupu yaalopó.

¹⁴ Atimané i fo yaalopó. “Naao senée du betale ni du mo ti aluyalepó. Naao wisi wisi ɔlaró néli butukutu betale ala wisinaaletamo aluyaletéiné momó kae kelaalomeipó.”

¹⁵ Téro, ai kale dosɔayale ɔla ɔlarape dotonóló néli botokó fu betale whɔrape atima kale so doasi susupu sóró kaketu betere alamó, atima witu-raalu, tumó daae mulu, dekené sukóló fakeyóló etei wole fo yaalopó.

¹⁶ “Doasi wió yae! Doi mole doasi be hulua-ó, ya tuamó betó mole so whiné aure ɔla ɔlarape i ape. *Linen* kuti wisinaalekélé, sukutai kuti, sonaai, *kold kapa*, doasi *moni* sere

kaporó du dui melexerapetamoné au wisi-naale yóló néli whi betaleti, mió wió yae.

- 17 Doasi *moni* sere wisi wisi ɔla fea hakele sukamótóró doyóló ai kemeyale ape.

Doasi wēi nuku só kotere so whikélé, ai nukumó kotere so whikélé, nuku tuamó kutó ditere so whikélé, *moni* saaire kutó ditere so whikélé, mo fea tumó kese anóló daae muaalopó.”

- 18 Kale so dukuraalu hotere sukuli kolóló, atimané i fo yaalopó. “Atei kaae doi mole doasi be hulua wisinaaleta, me kae mei, mo betatóró tēnapó,”

- 19 Atétepa, dekené sukuturaalu, atima hae diyóló, etei wole fakeyóló du betaalopó.

“Wió! Doasi doi mole be hulua-ó, wé! naao teyae.

Ai soné doasi wēi nuku talerape atima *moniné* doasi néli whi beteralepó.

Téyale sotei, hakele sukamó ɔ mo ti doyalopó.

- 20 Ó hepen bemó betó mole doasirape-ó, ai sopaae eratere alamó diɔ hajné sukutu betae.

Kótóné dowi ala kemeróló kae betera le so whikélé, *aposel* whirapekélé, Kótóné fo eratere kóló whirapekélé, hajné sukutu betae.

Ti noatepae, ai soné diɔpaae erale sekēi alamó, kwia Kótóné ɔpaae tokó melalepóló, diɔ hajné sukutu betae.”

- 21 Téró, doasi fotokó bole *ensel*-né mo doasi kane fake tao sóró doasi wēi kēla tópaee taae deróló duraalu,

“I doasi kane taae derótu dere kaae, kale doi mole Babilon be hulua kolokó dorowóló, mo ti doratere be, momó kae tēyaalomeipó.

22 Yā tuamó *kita* kaae ɔlané halekélé, wole fokélé, fó wutiné haleró *kapané* aleale ukulumó wutiné haletamo momó kae wosaalomeipó.

Be tɛtere ala ó nuku wisiraterere ala ó kae kae fosó fosótere whirape mo feata, Babilon yā tuamó mo kolókélé yaalomeipó.

Whiti o du deraketuraalu, kane fakené halekélé, momó kae wosaalomeipó.

23 Kale *lamp* sané derótu beteretei, momó kae deraalomeipó.

Soró whitamó dokóló ɔla deturaalu, hɛkese detere fo momó kaae wosaalomeipó.

Naao ɔla ɔla dotonóló duputua dere whirapeta, i haemó doasi doi mole whirapepó.

Naao isi whiné dere alané kae kae *Gavman*-né tɛteróló kaae tare aomó betó mole so whikélé, fea kópaae ɔlisóró fu betalepó.

24 Kale so tuamó, Kótóné fo eratere kóló whirapekélé,

Kótóné ama kaae beteró betere so whikélé, bóené mepaae i haemó betó mole so whi dale sameakélé ɔ tuamó mupa kelalepó,” yalepó.

19

Talené doi hale sóró horópóló yae!

¹ Ai ala yóló kemetepa wosalemó, ó hepen bemó so whi mo hale ɔla kaae wó muluraalu fo tiki whaa du betalepó. Atéró duraalu,

“Talené doi hale sóró horae.

Mo ti aluyaqsóró tao sere alakélé, ama ere alané doasi doi mole alakélé, fotokó doasi

bole alakélé, bete Tale dané Aya Kótó
átórótípó.

Ti noatepae, ama taleyóló só deratere ala hoko ini,
mo alatóró sya furaalu, dono taletua dapó.

² Atéturaalu, kale doasi doi mole nópu nokole soné
ama du betale alané i haemó betó mole
so whi kópaae faróló doralepó. Até yale
alamó, Kótóné ama kutó diratere whirape
dóló sókó fale sameamó kwia tokó malepó,”
yalepó.

³ Téró atimané momómo fo fakeyóló duraalu,

“Talené doi hale sóró horae.

Kale so duku bituraalu hotere sukuli tukókélé
ini, hāle holótóróti tarapó,” yalepó.

⁴ Ai fo deremó, kale 24 whi disiraperó kale
douró betere ɔlarapetamo kale teteróló kaae tare
doasi betere tikimó deraapisa fóló fió mulu fo
fakeyóló duraalu,

“Mo kée, Talené doi hale sóró horópoló yae!”
yalepó.

⁵ Tétepa, kale teteróló kaae tare doasi betere tikimó
sókó wale foné duraalu,

“Talené kutó diratere so whirape-ó, diā ɔpaae
winé sukóló, doasi doi mole so whiró doi
munire so whitamó feané dā teteróló kaae
tare Kótóné doi hale sóró horótu betae,”
yalepó.

⁶ Tétepa yało wosalemó, so whi mo hāle ɔla kaae
wó muluraalu dere fo tiki whaata, mo doasi wei
dou ɔaatu dere hu kaaeró doasi be sapalaa dere
kaaetamo yóló duraalu,

“Talené doi hale sóró horae.

Də kaae tare doasi fotokə bole Kótóné ɔla ɔla fea amatóro tɛteróló kaae tareteiné ama doi hale sóro horae!

⁷ Də fea haíné sukóló hɛkeseturaalu, ama doi doasi muópóló hale sóro horaalopa siépe.

Ti noatepae, kale *Sipsip* hupu malené so dokaaire be də sókó wapa, kale sekéné dokaaire soné ama auyaaire ɔla ɔla donoróló muló beterapó.

⁸ Kale so ɔ derópóló, fokó fale dəi *linen* kuti wisi-naale melalepó,” yalepó.

Ti ai kale dəi *linen* kuti wisinaaleta, Kótóné ama kae betere so whɛrapené du betale mo donoi alapaae dó faróló erapó.

⁹ Tétepa, kale *ensel*-né ɛpaae duraalu, “I fo aseɣae. Kale *Sipsip* hupu malené so dokaairaalu, ɔla deyaalopa ape,” yóló dape sere so whɛ mo doa haíné sínópóló yae. Téró ama duraalu, “Ita, Kótóné ama kólómó sókó wale fotóro dapó,” yalepó.

¹⁰ Até deremó, ɛ ama hó aqómó deraapisa fóló fió mulu, ɔpaae moma yaai yalepó. Atéyalemó, ama duraalu, “Atékesel! Ẽta, ɣaró Yesuné yale ala mopóló eró tare so whɛrapetamo də betə kutó diratere seképó. Térapa, Kótó aqómó sukóló bitu, ɔpaae betə moma yae. Ti noatepae, Yesuné yale ala etérópóló yó matere alané Kótóné kóló whɛrapené dere fo fea bete hakearótu beterapó,” yalepó.

Dəi hos hupu tómó betə seké whɛ betepa kelale fo

¹¹ Téró ɣalo kelalemó, hepen be tɛ tukwɛ fóló, dəi *hos* hupu ɛ daalepaae anóló daalepó. Ai hupu tómó betere whɛ mo foné betetóro bitu, Talené ala

eró tare Seképó dua dapó. Ai sekénéta, fo tokóló taletere alaró bóa dele alatamo, mo donotóró dua dapó.

¹² Ama keleta, mo si mi kaae buóo, ama topomó kale tēteróló kaae tare doasiné deró betere topo taorape deróo, erepó. Ama tikimó aseyóló muló betere doita, mo whi betānekélé tuēni, ama betā tuērapó.

¹³ Ama deró betere kutita, samea belere dolopaae deróló sókó sale kuti deró beterepó. Ai sekéné ama doita, ti Kótóné fopó.

¹⁴ Hepen bemó bóa dele *amirape* atimané deró betere kutita, mo fokó fale tikimó dei *linen* kuti wisinaale deróló, dei *hos* hupurape tómó betóló, kale sekéné sisómó wó tarepó.

¹⁵ I hae kwia feamó betó mole so whitamó bóa dóló tēteraairaaalu, bóa dele fosói sepake ama kólómó sókó wapa kelalepó. “Amata, *aiyon kapané* aleale nópulu taru, haemó betó mole so whi fea ama tēteróló kaae tawaalopó,” Ai sekénéta, mo doasi fotokó bole Kótóné dowi fopaae buló, kwia melaaire *wain* képi du wēi dōtere tikimó tēiya tēiya du beterapó.

¹⁶ Ama deró betere fōloi kutiró *fasatamomó* etei doi asērepó.

TĒTERÓLÓ KAAE TARE WHĪRAPE KAAE TARE DOASI
BETÓO,

I HAEMÓ DOASI ȲLA ȲLA TALERape TĒTERÓLÓ KAAE
TARE TALE BETÓO,
erapó.

¹⁷ Téró yało kelalemó, betā *ensel* suka ke tómó daalu, kale sikimó sē kotere barapepaae fo fakeyóló duraalu, “Kótóné ama doasi Ȳla

deyaalopa, diä fea betäpaae touräle ape.

¹⁸ Ti häle mei, Kale teterólo kaae tare doasi whirapekélé, diki tare whirapené topo whirapekélé, mo doasi fotokö buló bõe dele whirapekélé, *hos* hupuraperó ai hupu tómó betólo kotere whirapetamokélé, mo häle betere so whiraperó wae sóro betere so whirapetamokélé, mo doasi doi mole whiraperó doi muni häle betó mole so whirapetamokélé, i dosayale so whirapené tiki mirape diä naasepólopa, touräle ape,” yalepó.

¹⁹ Téró yälo kelalemó, kale *hos* hupu tómó betólo wale whiró ama bõe dele *amirapetamo* atima daae molepaae, kale syaae kaae ölaró hae kwia fea teterólo kaae dilikiyó mole doasi topo whirapetamokélé, atimané bõe dele whirapekélé touyólo, bõe daai wou betepa kelalepó.

²⁰ Téyaletei, kale syaae kaae ölaró, Kótóné ama köló whipólo kapala fo yó matere whitamó tawólo dokólo mulalepó.

Ti ai kale kapala fo yó matere köló whiné kale syaae kaae ölané doi doasi muópólo kae kae kelemei alarape erótu betalepó. Ti ama ai kelemei alarape yó melaetikimó, syaae kaae ölané siri sóo, ama aso aqmó sukólo bituraalu, dukiratero fo yóo, du betale so whirape köpaae fópólo dilikitu betale whipó. Téró, ai kale dokólo mulale seké tamo, betepatei doasi *sulpa* si duku betere wei këla belerepaae taae deralepó.

²¹ Téturaalu, atimaamoné bõe dele whirapeta, kale *hos* hupu tómó betólo wale whiné kölómo sóko wale sepakené mo fea dólo muó mupa, bara-

pené tiki mi nóló depe watamo fua yalepó.

20

1,000 ba fo tuamó yaaire ala

¹ Téró yalo kelalemó, ó hepen bemó *ensel* dorowou betalepó. Ai sekéné ama naasenéta, mo apaae derepale osono dolo tų kinaaire *kiró* mo doasi *sein* képitamo tarepó.

² Ai *ensel*-né kale wuli disó botokó sóró tawalepó. Ai disóta, mo taketi bitiré wale wulipó. Ama doita, Satan ó Kótótamo bóe du betere dowi kepepó. A dokóló muló betepa 1000 ba fopi kemeraairaalu dokalepó.

³ Téró, *ensel*-né kale wuli disó tawóló, mo apaae derepale osono dolopaae sóró taae deróló, tų kinóló diriraterere ɔlané mo ti diriralepó. Ti aita hāle mei, i hae kwiamó betó mole so whi ama momó kae dilikóló kópaae falaqsóró, 1000 ba fo tuamó hāle beteralepó. Ai ba forape kemetepa, kīlipaae sawatamo sukamó maaté a sókó daalóló, hāle beterópóló eraalopó.

⁴ Téró yalo kelalemó, teteróló kaae tare doasi betere searapemó fo tokóyóló taletere whirape betó molepó. Aimó, Yesuné yale alarape i ape, yóló yó matere foró Kótóné fotamo yó materemó, depa tikale so whinė keperapekélé, betó mupa kelalepó. Ti ai so whirapeta, syaae kaae ɔlaró ama asotamo aomó sukóló bitu, dukiraterere fo ini yóo, ama siri atimané kutirimó ó naasemó dakeraterere hō dua yóo, yale so whirapené keperapepó. Ai sekērape atimata, kepaayóló bituraalu, Yesu Kerisotamo

betámó 1000 ba fo tuámó teteróló kaae taté fópóló sóró beteralepó.

⁵ Téró, kale hāle sukāle whīrape atima hapale kepaani, 1000 ba fo kemeyale kīlipaae, ti kepaayóló betó muaalopó. Ti aita, folosóró kepaayóló betereiteipó.

⁶ Ai kale folosóró kepaayóló betere so whīta, Kótóné ama kae sóró beteró betereiteimó, mo hāiné sukóló betó mulapó. Tamo dakoróló sukutere alané atimapaee me sekēi ala eranénipó. Tēni, atima Kótóró Yesu Kerisotamopaae momaratere so whī bituraalu, ātamo betámó teteróló kaae taté fóló 1000 ba fo kemeyaalopó.

Satan doasi dele tuámó beteraaire fo

⁷ Téró ai kale 1000 ba fo kemetepa, Satan ā dipula beteraleti fópóló sókó daalaalopó.

⁸ A atéró sókó daalatepa furaalu, i hae detene fale douró kwiamó betó mole Kok fake so whīró Makok fake so whītamokélé dilikóló, dape siré kwēyóló bōe daai, betāpaae tourāle waalopó. Ti ai so whī, fea touróturaalu, wēi atikā supó.

⁹ Ai tourale *amirape* atima, delaapemó daayóló doasi mulure hae tiki mo sūróló wou, Kótóné ama so whī betere tiki boperóló betó molepó. Ai so whī betere tikita, ti Kótóné ama yaala sókó fóló mole be huluapó. Atima atéró be naai boperāle wóló betó molemó, ó hepen bemó si sókó dorowóló atima mo fea doló kemeralepó.

¹⁰ Ai kale siné doló kemeraale so whī dilikāle Kótótamo bōe du betere dowi kepe āta, kale *sulpa* si dó tare wēi kēla belerepaae taae deralepó. Take kale syaae kaae ɔlaró Kótóné ama kóló whīpóló

kapala fo yó male whītamo taae deraale kaae ʔkélé atéró taae deralepó. Atima atéró bituraalu, diki-tamokélé, dētamokélé, doakale dele doasi sóró kaketu betere alata kemekélé ini, hāle yótóróti tawaalopó.

Sukāle so whītamo fo tokóló tale yaaire fo

¹¹ Téró, kale tēteróló kaae tare doasi betere dei sea kolóo, ai sea tómó betere seké kolóo, yalepó. I haeró sātamota, ai kale doasi kilitu botokó feletei, kinaaire tiki meipó.

¹² Téró yālo kelalemó, take sisiraafe fele doasi doi mole so whī ó doi munire so whī, doasi betere tikipaafe anóló daafe molepó. Atima atéró daafe mole tuāmó, *buk*-rape dāafe faróló muó molepó. Me dāafe faróló mole *buk*-ta, mo titóróti betó tare *buk*-pó. Take kale sisiraafe fele so whīrape atimané yale alarape fea kale *buk*-rapemó aseyóló moletei, kolóló taleyalepó.

¹³ Kale wēi nóló sisiraafe fua yale so whīta, doasi wēi kēlané dotonale holóo, mo sukutere so whīrape fóló betere bemó betó mole so whīkélé, ti ai benétei dotonale wóo, sukutere alané tao tare so whīrapeta, ti ai alanétei dotonale wóo yalepó. Atéró wóló betó mupa, atima dokó feané yale ala donotóró taletua yalepó.

¹⁴ Téró, kale sukutere alaró sukāle so whīrapetamo betó mole tiki kale doasi si duku betere wēi kēla belere dolopaafe taae deralepó. Ti ai si duku betere wēi kēlapaafe taae deraleteita, tamoróló sukutere tikipó.

¹⁵ Téró, mo ti betere *buk*-mó doi munire so whī kale si dó tare wēi kēla dolopaafe taae deralepó.

21

Kisi Jerusalem be

¹ Téró yālo kelalemó, me i ala erepó. Take mole haeró hepen betamokélé kemeróturaalu doasi wēi kēlakélé kemeralepó. Téturaalu, kisi hepen beró haetamo sókó wóló mupa kelalepó.

² Téró yālo kelalemó, dowi ala betakélé munire kisi Jerusalem be hulua wisinaale, Kótó betere hepen be taaróló dorowou betalepó. Ai be hulu-ané ama ere alata, so seimale a whītamo dokaa kolóló kokōné sukī kuti wisinaale derótu dere kaae erepó.

³ Téró yālo wosalemó, kale tēteróló kaae tare doasi betere tikimó fo fakeyóló duraalu, “Mió, Kótó a betere be dorówóló so whītamo muóo, akélé atimatamo betóo, yaalopó. Atéru, atima ama so whītóró betepa, Kótó atimatamo betamó bitu, atima tēteróló tare Tale betaalopó.

⁴ Atéró, so whī feané wole kaaape ai sekēné helekóló kópuraalopó. Tétu, sukutere alakélé, dekené sukóló wole dere alakélé, moló hu dere alakélé, dele sere alakélé, momó kae yaalomeipó. Ti noatepae, folosóro yale alarape fea mo ti kemeró betereteinépó,” yalepó.

⁵ Téró kale tēteróló kaae tare tikimó betere doasiné duraalu, “Fea ɔla fea yālo kae kisi aletu beterapó! Térapa, yālo i yale fo naao aseyae. Ti noatepae, i dere fota, mo yaa dere ala dapóló diaaɔ tué tiki tiranérápó,” yalepó.

⁶ Téró ama epaae duraalu, “Ai alarapeta, fea ai yóló kemeyale ape. Eta, *Alaparó Omekatamo* bituraalu, kaae sereteiró kemeratereteitamo, mo

etórótípó. Whi me de wei nokole depa, mo ti betó tare tikimó wó tare wei me olané dupuni, hale nópóló yalo melaalopó.

⁷ Whi me de a tu wisipaae faai felalemó, sesétepakélé hepée taae faróló wale whiné i ɔla ɔlarape fea take ama saalopó. Téturaalu, e a tetéroló kaae tare Kótó betóo, a yalo naale betóo yaalopó.

⁸ Téretei, atimapaee me sekei ala eraosóro witu, e taaróló fele so whikélé, whiné sotamo dere ala kaae yóló whi hamomatamotei dowi ala du betere so whirapekélé, whi dele whirapekélé, nópu nokole so whikélé, kapo nipaae momatere alaró herei whétamoné whi dele so whikélé, kapala fo dere so whikélé, mo fea atima betaaire tikita, *sulpa* si duku betere wei kela ai ape. Ti aita, atima tamoróló sukaaire alapó,” yalepó.

⁹ Mo kemeróturaalu melaaire weikeró sekei alarape belere nuku tare weikeró *ensel*-rapekó betané epaae duraalu, “Kale *Sipsip* hupu malené dokaairé so, yalo yapaae yó melaalopa, kelaai ape,” yalepó.

¹⁰ Ai fo deremó, Dei Kepe Wisiné e fotokó bu-latepa, kale *ensel*-né mo doasi sokore hasi fosópaae beleyóló sóro holalepó. Atéro sóro holóló beteró bituraalu, dowi ala mo betakélé munire be hulu Jerusalem, Kótó betere hepen be taaróló ai dorowou beterapa, kelaé yóló yó malepó.

¹¹ Tétepa yalo kelalemó, ai kale be huluata, Kótóné ama ere de wisinaale deyó faralepó. Atéro ere deta, mo doasi *moni* duputere kanené kasa kasare de kaae erepó. Mo hale kaponé ere de kaae mei, *jaspá* kanené de kaaetórótípó. Mo hukulukélé

ini, *klas* kasa kasa kaae yó fi *jaspá* kane wisi-naalené ere de kaaepó.

¹² Ai be huluata, doasi dopóku ópaae horóló deyóló boperó beterepó. Ai dopóku tuamóta 12-tu dolorape móo, ai tu kaae diliki yóló 12-*ensel*-rape daa yóo, ai tu serekemó 12-Israel fakené doirape asę yóo, erepó.

¹³ Ai dopókumó suka hoterepaaeróló tu sereke sore muóo, suka doropolepaaeróló tu sore muóo, *saot* depaaeróló sore muóo, *norti* depaaerólókélé, sore muóo erepó.

¹⁴ Ai kale be hulua boperóló dere dopóku 12-ró kapo fakerapené mukuté mulaté horepó. Ai 12 mukuté mole kane fake tómó, kale *Sipsip* hupu malené sóró betero betere 12 *aposel* whırapené doi asęrepó.

¹⁵ Eıamo kale fo yale *ensel*-né kale be huluakélé, dopóku dereteikélé, tu serekerapekélé fea sıróló dale saairaalu *kold kapané* aleale dotó tiki tarepó.

¹⁶ Ai be huluata etéro teyóló muló beterepó. Filipaaró betereteiné daleró doló faló betereteiné daleıtamota, ti mo betı kaaetórótıpó. Kale sekéné ama dale saai tare dotó tikiné be hulua sıróló dale saleteıta, doló faló betereteikélé, filipaaró betereteikélé, ópaae horeteikélé, mo betı kaaetóró 2200 *kilomitapó*.

¹⁷ Téro kale dopóku hapólu eretei ama dale saleteıta, 65 *mita*-pó. Ti ai *ensel*-né ama dale sere alata, me kae mei, mo whıné dere kaaetóró yalepó.

¹⁸ Ai kale be hulua boperóló dere dopókuta, *jaspá* kanené aleyóo, be huluata, ti *kold kapa* wisinaalené aleyóo erepó. Ai kale *kold kapata*,

hukulukélé ini, mo kasa kasa yó fipó.

¹⁹⁻²⁰ Ai be hulua boperóló dere dopóku mukuté mulaté hore kapo fakerape auraaairalu, mo doasi *moniné* duputere kae kae kasa kasai kanerapéné auró beterepó. Folosóró kaae suraalu, muló betere mukuté *jaspa* kanené auróo, 2 ti *sapaia* kanené auróo, 3 ti, *kalsitoni* kanené auróo, 4 ti *emerald* kanené auróo, 5 ti *sadoniks* kanené auróo, 6 ti *kanilian* kanené auróo, 7 ti *krisolait* kanené auróo, 8 ti *berl* kanené auróo, 9 ti *topas* kanené auróo, 10 ti *krisopres* kanené auróo, 11 ti *jasint* kanené auróo, 12 ti *ametes* kanené auróo, erepó.

²¹ Kale ai dopóku 12 tų serekerapeta, 12- du dui meleke *perl*-né alée molepó. Ai tų sereke dokota, mo betą *perl* doasiné alée mulapó. Be hulua tuamó fale tųta, *kold kapa* wisinaale mo kasa kasai *klas* kaaené aleyóló molepó.

²² Ai be hulua tuamó Kótópaae momatere be betą kilinipó. Ti noatepae, doasi fotokọ bole Tale Kótóró kale *Sipsip* hupu male atimaamota, ti ai be hulua tuamó ere momatere betórótípó.

²³ Ai be huluamó Kótóné ama ere alané dęró kale *Sipsip* hupu malené dętamo eró betereteiné, suka dęró wélié dętamo mo yąyą inipó.

²⁴ Ai be huluamó dęyó fale dęné, i haemó betó mole so whį fea diliki dolomó kutu betaqsóró, ai dęné dęraalopó. I haemó tętەرóló kaae tare topo whįrape, atima mo kelaalo kokoné sini ala wisinaale sóró wóló ai be tuamó mulaalopó.

²⁵ Ai be hulua tuapaae faaire tųrape kinókélé ini, mo hąle tukwę faróló muló betaalopó. Ti noatepae, aimó diki dere ala muni, dętóró yó tareteinépó.

²⁶ Kae kae hae kwiamó betó mole so whiné doasi doi mutere alaró, kelaalo kokoi ala wisinaaletamo soro wóló ai be hulua tuamó mulaalopó.

²⁷ Dowi ala mole whi ai be hulua tuamó sókó faalomeipó. Halei ala dere whiraperó, kapala dilikitere so whi betakélé ai be hulua tuapaae mo sókó faalomeipó. Kale *Sipsip* hupu malené mo ti betere *buk*-mó doi mole so whi betá ai be huluamó fóló betaalopó.

22

Mo ti betó tawaaire wēi

¹ Téró, kale *ensel*-né epaae mo ti betó tawaaire fu betere kikisi wēi kelaai ape yóló yó melalepó. Ai fole wēita, Kótóró kale *Sipsip* hupu maletamoné teteróló kaae tare doasi betere tikimó sorokó wóló, ai be hulua tuamó fale tū seraa fu betepa kelalepó.

² Ai wēi fóku uté dero, ité detamomó mo ti betó tare ni daalepó. Wélié dokó fea ai niné du oletua dapó. Ai niné ama sókuta, i hae kwiamó betó mole so whi tuamó mole kae kae sekei alarape fea i ni sóku fotokóné sumó wisiranérapó.

³ Take so whiné yale dowi alamó Kótóné erale sekei ala ai be huluamó momó kae muaalomeipó. Kótóró *Sipsip* hupu maletamoné teteróló kaae tare tiki ai be huluamó mupa, ama kutó diratere so whiné ama erae dere ala erótu betaalopó.

⁴ Atimané ama kelepaa kolóo, ama doi atimané kutirimó asē yó fío, yaalopó.

⁵ Aimó be dikitere ala momó kae muaalomeipó. Atima suka de ó sá dekélé, yayatere ala mo

enénipó. Ti noatepae, atima de tuamó beterópóló Tale Kótóné ama ere dené deró betaalopó. Atéro bituraalu, betere dokó fea atimanékélé, fea ala fea teteróló kaae taté fu betaalopó.

⁶ Tale ata, ama kóló whirapené keperape teteróló kaae tare Kótó beterapó. Atéru, mo felekemó eraaitere ala ama kutó diratere so whipae ene fópóló, ama *ensel* atima beterepae doteyalepó, yalepó.

Yesu walapóló ere fo

⁷ “E mo felekemó waalo ai ape. Kótóné i ala eraalopóló i *buk*-mó asere fo eró tare so whita, Kótóné atima wisiralepóló, hajné sukutu betaalo ai ape,” yalepó.

⁸ I yale forape wosóo, yale alarape kolóo, yale whita e Jon-pó. I alarape yó male kilipae ai yó male *ensel* daale tikimó apae moma yaai der-aapisa fóló fió mualepó.

⁹ Téyalemó, ama epae duraalu, “Atékese! Eta tale mei, damo wusuró Talené kutó diratere whipó. Nonaorape Kótóné kóló whirapekélé, kale i *buk*-mó mole fo eró tare so whikélé, da fea betá kutó diratere fakepó. Térapa, Kótó aqmó sukóló bitu, ama doi betá sóró horótu betae,” yalepó.

¹⁰ Téró, kale dere kaae epae momó duraalu, “Kótóné i ala eraalopó ere fo hakearóló i *buk*-mó aseyóló muló betere fo kinóló mulaose.

¹¹ Dowi ala du betere so whita, atima ai alatóró yó tanópóló yae. Kae kae mo kelaalo sonalei dowi ala du betere so whita, ti ai alatóró du beterópóló yae. Mo donoi ala wisi du betere so whita, ti atimané ai du betere wisi alatóró yó

tanópóló yae. Me dowi alatamo hosekéní, Kótóné ama kae beteró betere so whì ti atima ai betere kaaetóró betó tanópóló yae,” yalepó.

12 “I dere fo wosae, ẹ mo felekemó waalo ai ape!
So whì dokọ feané yale alamó tokọ melaai
yalo i tare duputa, ẹ wouraalu melaalo ai
ape.

13 Ẹta, *Alaparó Omekatomopó*. Folosóró kaae
sóró betaleteiró, kemerale foloteitamota
etórótípó.

Qla qla fea keké nale betekélé, fea ala touróló
kemeratere betekélé, ti mo etórótípó.

14 Deróló sókó fatere fọloi kutu fokotu betere
so whìta, Kótóné wusiró betera hainé
sukutu betae.

Ti atétere so whì be dopóku tų serekemó doasi
be huluapaae sókó fọo, mo ti betere ni du
tokó nóo, yaairetei, mo sųrapó.

15 Kale dopóku aqró haqrare betó mulapó.

Ai haqrapeta i ape. Whéró hereitamóné
whì dele alakélé, kae kae hosó fo ó isi
whíné dere alakélé, nópu nokole alakélé,
whì dele alakélé, kapala kótóraperó keper-
apetamopaae momatere alakélé, kapala fo
yóló whì dilikaaí ekele du betere alakélé, i
dosayale alarape du betere so whì atima
feata, dopóku aqró betó mulapó.

16 Ẹta, Yesupó. I kelale alarape Keriso fake so
whíné dosayóló tuẹ yópóló, diapaae yó
male fae yóló yalo *ensel* doteyalepó.

Ẹta, Depit kaayale beteró ama deté fele
naalené naaletamopó.

Atéru, hika be dēteretamo dēyó tare hōrepó,” yalépó.

¹⁷ Kale Dēi Kepe Wisiró whiné dokaai du betere sotamoné duraalu, “Ape,” du beterapó. Mepaae i dere fo wosetere so whínékélé “Ape,” yópóló yae. Mepaae whi de wēi nokole depa, ẹ beterepaae wópóló yae. Mepaae whi dené wēi nenée du betepa, mo ti betó tawaaire wēi dupuni, hāle sóró nale wópóló yae.

¹⁸ Kótóné i ala eraalopóló, *buk*-mó asere fo wosetu betere so whi feapaae dirii ma fo i dapa wosae. Mepaae so whi denétamo i *buk*-mó mole fo tómó me kae beleróló depa, ti Kótóné i *buk*-mó bopetu betere sekēi alarape ai so whipaae mo turó eraalo ai ape.

¹⁹ Mepaae whi dené Talené i ala eraalopóló *buk*-mó mole fo mepaae kwia tokóló aluratepa, ti Kótóné atétere whimó melaalopóló i *buk*-mó bopeyale mo ti betere ni du náo, kae tene be hulu-amó beteró, yaai yale alatamo ama fasó saalopó.

²⁰ I kale asẹyóló muló betere alarape kelale whiné duraalu,
“Mopó. Ẹ felekemó walapó,” fo dapó.

Tétepa duraalu,
“Mo kée Táyópóló yae.

Tale Yesu-ó, yā ape,” dapó.

²¹ Tale Yesuné hāle tao sere ala wisinaale Kótóné so whipaae wópóló yae. Mo kée. Táyópóló yae.

**Yesu Kerisoné So Whi Tao Sere Kisi Fo Wisi
The New Testament in the Falopa Language of Papua
New Guinea**

copyright © 2005 Wycliffe Bible Translators, Inc.

Language: (Folopa)

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2009-10-31

PDF generated using Haiola and XeLaTeX on 18 Mar 2025 from source files dated 31 Aug 2023

0102a9df-173c-5a64-b766-14ab67a86105